

民國五年重修

淮陽縣志

卷首 圖經

卷一

地輿志上

星野

沿革

表附疆域

村保集鎮附山水

埠口附

卷二

地輿志下

古蹟

冢墓附風土

卷三

籍賦志

戶口 丁地 征解 留支 蠲緩 雜稅 鹽引

卷四

建置志

城池 宮署 壇廟 坊表 橋梁

卷五

學校志

學宮 學署 學額 學田 書院 義塾

卷六

經政志

秩祀 禮儀 兵防 郵政 倉儲 郵政

卷七

職官表 名宦傳

卷八

選舉表

辟舉 文武科目 貢生 學校畢業
文武例仕 封贈 世襲 恩廕

卷九

人物傳上

先賢 鄉賢 先正 文仕蹟 武仕蹟

卷十

人物傳上

孝友 忠烈

卷十一

人物傳上

義行

卷十二

人物傳上

文學 隱逸

卷十三

人物傳上

方技 耆壽 流寓

卷十四

人物傳下

列女

后妃

節婦

卷十五

人物傳下

列女

節婦

卷十六

人物傳下

列女

烈婦

孝婦

淑媛

貞女

烈女

孝女

卷十七

藝文志上

著述 金石

卷十八

藝文志下

輯類文

詔勅
祭文

表疏
誌銘

碑記

論辨序引

卷十九

藝文志下

輯類詩

賦頌
古樂府

古詩
歌詞

五七古

五七律

五七絕

卷二十

雜誌上

災異

兵事

雜誌下

方外

寺觀

志餘

淮陽縣志卷九

傳

人物上 先賢 鄉賢 先正 仕蹟 孝友 忠烈

義行 文學 隱逸 方技 耆壽 流寓

龍門列傳七十志家仿之分傳人物陳自嬌滿傲疆列孔牆者
四人漢夷爲縣英賢碩彥歷載史乘自是以降曜顯宦敦至行
難不苟免祿不苟就與夫鄉黨稱善風雅作人榛苓所在指不
勝屈發前哲之幽光卽後進之表率缺誠有間徵無不舉并有
名成一藝福錫百齡賢達鴻雪足資起興收善務廣例均登錄
傳人物

先賢

周

顓孫師字子張孔子弟子爲人有容貌資質寬中博接從容自務
子貢曰美功不伐貴位不善不侮不佚不傲無告是顓孫師之
行也唐贈陳伯宋封宛邱侯再封陳國公陞十哲位

巫馬施字子期孔子弟子孔子來游子期與子路薪於韞邱之下
國之富人有處師氏者脂車百乘觴於韞邱之上子路語子期
曰使子無忘子之所知亦無進子之所能得此富終身無復見
夫子子爲之乎子期喟然仰天而嘆闐然投鎌於地曰吾聞之
夫子勇士不忘喪其元志士仁人不忘在溝壑子不知予歟試
予歟意者其志歟子路慚負薪先歸嘗宰單父先是魯人宓子
賤爲單父宰鳴琴而治子期繼之以星出以星入日夜不處而
單父亦治子期問於子賤曰子鳴琴而單父治亦不見其勞何
也子賤曰我任人子任力任人者逸任力者勞子期曰是適之

未至也唐贈郇伯宋封東阿侯祀文廟西廡

陳亢字子禽孔子弟子陳子車死於衛其妻與其家大夫謀以殉葬定而後亢至以告曰夫子疾莫養於下請以殉葬亢曰以殉葬非禮也雖然則彼疾當養者孰若妻與宰得已則吾欲已不得已則吾欲以二子者之爲之也遂弗殉唐贈潁伯宋封南頓侯祀文廟東廡

公良孺字子正孔子弟子賢而有勇孔子適衛路出於蒲會公孫氏以蒲叛衛而止之公良孺以私車五乘從孔子行喟然曰昔吾從夫子遇難於匡伐檀於宋今遇困于此命也夫吾與夫子再罹難甯圖而死挺劍而合衆將與戰蒲人懼曰苟無適衛吾則出子乃盟孔子而出之東門孔子遂適衛唐贈東牟伯宋封

牟平侯祀文廟東廡

世碩七十子之弟子著書二十一篇名世子又作養書一篇以爲
人性有善有惡舉人之善性養而致之則善長惡性養而致之
則惡長如此則性各有陰陽善惡在所養焉宓子賤漆雕開公
孫尼子之徒亦論情性與世子相出入云

鄉賢

漢

鄭當時字莊其先鄭君嘗爲項籍將籍死已而屬漢高祖令諸故
項籍臣名籍鄭君獨不奉詔詔盡拜名籍者爲大夫而逐鄭君
鄭君死孝文時鄭莊以任俠自喜脫張羽於屐聲聞梁楚之間
孝景時爲太子舍人每五日洗沐常置驛馬長安諸郊存諸故
人請謝賓客夜以繼日至其明旦常恐不徧莊好黃老之言其
慕長者如恐不見年少官薄然其游知交皆其大父行天下有
名之士也武帝立莊稍遷爲魯中尉濟南太守江都相至九卿
爲右內史以武安侯魏其事議貶秩爲詹事遷爲大農令莊爲
太史誠門下客至無貴賤無留門者執賓主之禮以其貴下人
莊廉又不治其產業仰奉賜以給諸公然其餽遺人不過算器

食每朝候上之間說未嘗不言天下之長者其推轂士及官屬
丞史誠有味其言之也嘗引以爲賢於己未嘗名吏與官屬言
若恐傷之間人之善言進言上唯恐後山東士諸公以此翕然
稱鄭莊鄭莊使視決河自請治行五日上曰吾聞鄭莊行千里
不齋糧請治行者何也然鄭莊在朝常趨和承意不敢甚引當
否及晚節漢征匈奴招四夷天下費多財用益匱莊任人賓客
爲大農僦人多通貢司馬安爲淮陽太守發其事莊以此陷罪
贖爲庶人頃之守長史上以爲老以莊爲汝南太守數歲以官
卒鄭莊汲黯始列爲九卿廉內行修絜此兩人中廢家貧賓客
益落及居郡卒後家無餘貲財莊兄弟子孫以莊故至二千石
六七人焉

史記

汝郁字叔異性仁孝年五歲母病不能食郁常抱持啼哭亦不食

母憐之強爲飯宗親共異之因字曰異及親歿遂隱處山澤賈
逵薦於和帝帝卽徵之其見優禮後累遷爲魯相以德教化百
姓流人歸者八九千戶

後漢書
賈逵傳

魏昭字德公童時太原郭泰止陳昭知其有異求入其房供給洒
掃泰曰年少當精義書曷爲來近我乎昭曰蓋聞經師易遇人
師難遭故欲以素絲之質附近朱藍爾泰美其言聽與共止嘗
不佳夜命昭作粥粥成進泰泰一噉怒呵之曰爲長者作粥而
不加敬使沙不可食耶以杯擲地昭更爲粥重進泰復呵之如
此者三昭容色無變意殊悅泰曰吾始見子之面今乃見子之
心遂與友善卒爲妙士

漢紀參
通鑑

張季禮遠赴師喪行至汝南界中遇寒冰車毀頓滯道路頗陰劉
翊子相見而謂之曰君慎終赴義行宜速遂卽下車與之不告

姓名策馬去季禮義其子相也後故道頽陰還所假乘翊閉門
辭行不與相見云

後漢書
劉翊傳

晉

王隱字處叔世寒素父銓歷陽令少好學有著述之志每私錄晉
事及功臣行狀未就而卒隱以儒素自守不交勢援博學多聞
受父遺業西都舊事多所諳究建興中過江丞相軍諮祭酒涿
郡祖納雅相知重納好博奕每諫止之納曰聊用忘憂耳隱曰
蓋古人遭時則以功達其道不遇則以言達其才故否泰不窮
也當今晉未有書天下大亂舊事蕩滅非凡才能立君少長
五都游宦四方華夷成敗皆在耳目何不述而裁之應仲遠作
風俗通崔子真作政論蔡伯喈作勸學篇史游作急就章猶行
於世便爲沒而不朽當其同時人豈少哉而了無聞皆由無所

述作也故君子疾沒世而無聞易稱自彊不息况國史明乎得失之跡何必博奕而後忘憂哉納喟然歎曰非不悅子之道力不足也乃上疏薦隱元帝以草創務殷未遑史官遂寢不報太興初典章稍備乃召隱及郭璞俱爲著作卽令撰晉史豫平王敦功賜爵平陵鄉侯時著作卽虞預私撰晉書而生長東南不知中朝事數訪於隱并借隱所著書竊宋作盜寫之所聞漸廣是後更疾隱形於言色預既豪族交結權貴共爲朋黨以斥隱竟以謗免黜歸于家貧無資用書遂不就乃依征西將軍庾亮于武昌亮供其紙筆書乃得成詣闕上之隱雖好著述而文辭鄙拙蕪舛不倫其書次第可觀者皆其父所撰文體混漫義不可解者隱之作也年七十餘卒于家

晉書

周翼字子鄉祖奕上谷太守父優車騎咨議翼幼孤依舅高平郗

鑒值永嘉喪亂飢饉相望鄉人以鑒名德傳共飭之時兄子邁及翼並小嘗携之就食鄉人曰各自飢困以君賢欲共相濟耳恐不能兼有所存鑒於是獨往食訖以飯著兩頰邊還吐與二兒後並得存同過江翼爲剡縣令鑒之薨也翼追撫育之恩解職而歸席苦心喪三年厯青州刺史少府卿六十四卒

晉書

唐

袁楚客初魏元忠相武后有清正名至神龍中自端州召還再輔

政天下傾望冀幹正王室而稍憚權倖不能賞善罰惡譽望大減時楚客爲酸棗尉以書規之指陳十失元忠得書益慙開元二年玄宗置左右教坊選樂工數百人自教法曲於梨園又教宮女使習之又選妓女置宜春院給賜其家楚客上疏以爲上春秋鼎盛宜從經術邇端士尚朴素深以悅鄭聲好遊獵爲戒

上嘉賞之與梁昇卿並以直言極諫科及第

新唐書

殷侑幼有志於學不治貨產長通經術以講道爲娛貞元末及五經第其學長於禮擢太常博士元和八年回鶻請和親朝廷以仰費廣劇欲紓以期詔侑宗正少卿李孝誠使回鶻可汗驕甚盛陳甲兵欲臣使者侑不爲屈已傳命虜責其倨宣言欲留不遣衆色怖侑徐曰可汗唐婿欲坐屈使者拜乃可汗無禮非使臣倨也虜憚其言不敢逼還遷虞部員外郎王承宗叛遣侑招諭承宗聽命進諫議大夫侑論朝廷治亂得失前後凡八十四通以語切出爲桂管觀察使寶曆元年徙江西所至以絜廉稱人爲衛尉卿文宗即位李同捷叛而廷濬陰爲脅齒兵久不解詔五品以上官議尚書省帝銳欲討賊羣臣無敢異論者獨侑請舍廷濬而專事同捷且言願以宗社安危爲計善師攻心爲

武含垢安人爲遠圖網漏吞舟爲至誠帝不納然內嘉尚同提
平以侑嘗爲滄州行軍司馬遂拜義昌軍節度使於時瘵荒之
餘骸骨蔽野墟里生荆棘侑單身之官安足羸淡與下共勞苦
以仁惠爲治歲中流戶襁屬而還遂爲營田丐耕牛三萬詔度
支賜帛四萬匹佐其市初州兵三萬仰稟度支侑始至一歲自
以賦入贍其半二歲則周用乃奏罷度支所賜戶口滋饒膺儲
盈腐上下便安請立石紀政以勞加檢校吏部尚書六年徙天
平節度自李師道亂朝廷雖析三鎮然務安反側賦入盡爲軍
費無輸王府者侑以餉軍有贏當上送官乃裁制經費歲以錢
十五萬緡粟五萬石歸有司加檢校尚書右僕射御史大夫温
造劾侑違制擅賦斂民爲無名之獻詔以庾承宣代還會濮州
掾崔元武受吏賕又率屬邑奉錢增私馬估售官疊三罪計緡

百二十四大理以入私馬一重削三官刑部覆訊當流未決侑
奏三犯不同坐所重律類賊者累論元武犯皆枉法當死詔用
覆訊流元武賀州帝嘉侑守法進刑部尚書以造所奏不直復
用爲天平節度開成元年再召爲刑部尚書時李訓鄭注已誅
帝問侑治安術侑言朝廷宜任耆德母輕用新進帝善之賜絲
三百匹初鹽鐵度支使屬官悉得以罪人繫在所獄或私置牢
院而州縣不聞知歲千百數不時決侑奏許州縣糾列所繫申
本道觀察使并具獄上聞許之賜黃金十斤以酌直言涇原節
度使朱叔夜坐侵牟士卒贓數萬家畜兵器罷爲左武衛大將
軍侑薄其罪天子由是疏之賜叔夜死出侑爲山南東道節度
使坐減兵不先論啟左遷太子賓客分司東都俄領忠武節度
卒年七十二贈司空侑以經術進臨事銳敏有彊直名晚節內

冀台輔稍務交結而素望少衰云孫盈孫盈孫廣明初爲成都諸曹參軍僖宗至蜀聞有禮學擢太常博士光啟三年帝將還京而七廟焚殘告享無所盈孫白宰相始乘輿西有司盡載神主以行至鄂悉爲盜奪今天子還宮宜前具其禮宰相建言修復宗廟功費廣請與禮官議時他博士不在獨盈孫從議曰故廟十一室二十三楹楹十一梁垣墉廣袤稱之今朝廷多難宜少變禮按至德時作神主長安殿饗告如宗廟廟成乃祔今正衙外無它殿伏聞詔旨以少府監寓太廟請因增完爲十一室其三太后廟權舍西南夾廡須廟成議遷詔可自是神主樂縣皆所制定舊學禮家當其議龍紀元年昭宗郊祠兩中尉及樞密皆以宰相服侍上盈孫奏言先世典令無內官朝服侍祠必欲之當隨所攝資品雖無援據猶免僭逼詔可時喪亂後制度

彭綮追補容典皆盈孫折衷焉終大理卿贈吏部尚書

新唐書

宋

符彥卿字冠侯五代時存審子年十三能騎射性謹愿出入唐莊

宗卧内及長以爲親從入汴遷散員指揮使天成中大破契丹

於嘉山授慶州刺史耀州團練使晉天福初領同州節度使少

帝時出鎮河陽三城加平章事改節武定軍漢祖移鎮兗州加

兼侍中乾祐中兼中書令封魏國公官太保周祖卽位封淮陽

王領天雄軍節度使尹大名進封魏

舊志作衛誤

王長女適世宗卽

宣懿皇后拜太傅改魏王恭帝加太尉詔書不名建隆四年來

朝欲留典兵趙普言其名位已極不可復委兵權宣已出普復

留之太祖問卿何苦疑彥卿朕待之厚豈忍負朕耶普曰陛下

何以能負周世宗太祖默然遂罷移鎮鳳翔被病請還洛陽從

之次女復爲太宗皇后加太師彥卿本起將家子勇畧有謀善
用兵凡得賞賜悉分帳下故士卒樂爲効死契丹自陽城之敗
其主乘橐駝以遁喪其器甲旗仗數萬故尤畏憚之呼爲符王
耶律德光陷晉其母問彥卿安在左右對已遣歸徐州矣母曰
留此人中原何失策之甚其威名如此鎮大名十餘年政委牙
校劉思遇貪黠怙勢公府之利多入其家彥卿不之覺時藩鎮
率遣親吏受民租槩量增益公取其羨而魏郡尤甚太祖聞之
遣常叅官上其事斛量始平其羨餘粟詔賜彥卿以愧其心性
不飲酒頗謙恭下士對賓客終日談笑不及世務不伐戰功居
洛陽春月嘗乘小駟從家僮遊僧寺名園優游自適然酷好鷹
犬吏卒有過求名鷹犬以獻雖戚怒必勸之人以此譏卒年七
十八三子昭信天雄軍衙內都指揮使領賀州刺史顯德初卒

贈檢校太保閬州防禦使 昭愿字致恭謹厚謙約頗讀書好
事蔭補牙職俄領興州刺史國寶申補供奉官遷西京作坊副
使出護陳許蔡潁等州巡兵征太原爲御營四面巡檢使攻幽
州與宋偓率兵萬餘營於城南師還真拜蔡州刺史知并澶二
州連知永興軍梓滑二州咸平初又爲天雄邢州二鈐轄以疾
求歸京師卒年五十七車駕臨哭贈鎮東軍節度使子承煦左
千牛衛將軍 昭壽初補供奉官改西京作坊副使歷遷六宅
副使領蘭州刺史雍熙二年命與劉知信護鎮州屯兵北征爲
押隊都監轉尚食使真拜光州刺史知洪定二州咸平初遷鳳
州團練使監州鈐轄在州恣肆放縱軍人怨憤爲神衛卒趙延
順等八人所殺子承諒娶齊王女嘉興縣主至內殿承制 曾
孫惟忠字正臣以外祖母賢靖大長公主蔭爲三班奉職擢閤

門通事舍人勾當東排岸司三司使寇瑊繩下急漕米數不足
吏卒率論自盜惟忠以法爭之瑊怒惟忠辦愈力咸得坐賊仄
之以西染院副使權提舉倉草場提點開封府界縣鎮公事宰
相王曾外孫樂誥爲開封簿以無善狀不肯薦獨薦長城尉吳
奎且厚遇之誥果以贓敗惠民河與刁河合流歲多決溢害民
田惟忠自宋樓鎮礮灣橫隴村置二斗門殺水勢以接鄭河自
是無水害陝西用兵除涇原路兵馬鈐轄兼知涇州再遷西上
閣門使副富弼往報契丹求地至武彊縣疽發背卒贈客省使

眉州防禦使

宋史

段少連字希逸其先開封人父子昂爲陳州錄事參軍因家於陳
其母嘗夢鳳凰集家庭寤而生少連及長美姿表倜儻有識度大
中祥符七年秋登服勤詞學科釋褐試秘書省校書郎知崇陽

縣崇陽劇邑自張詠爲令有治狀其後惟少連能繼其風權杭
州觀察判官時樞密直學士李公及領餘杭郡當時清德於人
少許可大愛少連之才與本道轉運使薦之改秘書省著作佐
郎累遷太常博士時章憲太后臨朝少連與曹修古等上言外
戚劉從德家恩幸太過責授秘書丞監漣水軍稅務復太常博
士通判天雄軍太后崩召爲殿中侍御史與孔道輔等伏閣言
郭皇后不當廢少連坐贖復上疏諫未幾除開封府判官歷兩
浙轉運使少連以兩浙財賦爲天下最孜孜利病無弊不革舊
使者所至郡縣索簿書不暇閱委之吏胥吏胥持以爲貨少連
命郡縣上簿書悉緘識遇事間指取一二自閱摘其是者按之
餘不及閱者全緘識以還由是吏不能爲奸部吏有過召詰曰
聞子所爲若此有之乎有當告我我宥汝自新吏皆以實對少

連得其情戒飭使去後有能自改過者猶保任之秀州獄死無
罪人時少連在杭吏畏恐聚謀偽爲死者服罪欵未及綴屬少
連已拏舟入城訊獄吏具服請罪以爲神明是時鄭向守杭無
治才訟者不服往往徑趨少連一言處決莫不盡其理徙陝西
駙馬都尉柴宗慶知陝州縱其下擾民少連入境劾奏之時元
昊反范仲淹薦少連才堪將帥遷龍圖閣直學士知涇州改渭
州命未至而卒少連通敏有才遇事無大小決遣如流不爲權

勢所屈既卒仁宗歎惜之

宋史本傳范
文正集墓表

常同字子正御史安民子政和八年進士建炎四年召同至行在
爲大宗丞紹興元年乞郡得柳州召還首論朋黨之禍除殿中
侍御史時韓世忠劉光世私忿欲交兵同奏光世等不思待遇
之恩而驕狠尚氣無所忌憚望分是非正國典上以章示兩軍

呂頤浩再相同論其十事頤浩罷相論知樞密院宣撫川陝張浚喪師失地遂詔浚福州居住四年除起居郎中書舍人史館修撰一日奏事上愀然曰向昭慈嘗言宣仁有保佑大功哲宗自能言之止爲宮中有不得志於宣仁者因生誣謗欲辯白其事須重修實錄具以保立勞效昭示來世此朕選卿意也同乞以所得聖語宣付史館仍記於實錄卷末俄除集英殿修撰知衢州以疾辭除徽猷閣待制提舉江州太平觀紹興二十年卒

宋史

黃實字師是章惇之甥登進士歷司農主簿提舉元豐末議罷提舉官惇屬蔡確徙提點開封縣鎮歷遷京東京西淮東常平河北轉運副使惇罷林希言其在陳與蘇轍友善兩女皆嫁軾子所爲不正不宜用哲宗以知陝州久之陞江淮發運副使賀遼

主登位還除太僕卿擢實文閣待制知瀛與定州朝旨籍民兵
旁郡因緣擾困實懷檄不下爲條畫利害上請事遂得免俄卒
于官贈龍圖閣直學士爲人孝友敦睦以內行稱因惇故獲免

黨禍

宋史

李宗易字簡夫少好學詩仿白樂天慶厯間厯諸部官至太常少
卿得微疾輒乞歸所與交多名士晏元獻殊知之尤深優游林
泉者十六年陳人種花有洛陽風宗易觴詠其間蘇轍爲宛邱
博士時與之游見轍所作李簡夫少卿詩集引仲子君武以武
舉中第孫公輔宣德郎

陳亨祖淮甯大豪紹興末官軍復蔡州亨祖領民兵據淮甯執金
知州完顏耶魯以其城來歸命爲武翼大夫知淮甯府金兵攻
城亨祖力戰死之舉家五十餘人皆死贈容州觀察使立廟光

州賜額憫忠

元

王逢吉甫仕至兵部尚書以功名終歸葬於陳

明 王逢吉別號謙齋官翰林院編修學問老成健于賦咏後進宗之

房寬洪武中以濟甯左衛指揮從徐達練兵北平遂爲北平都指揮同知移守大寧寬在邊久凡山川阨塞殊域情僞莫不畢知燕兵奄至城中縛寬以降成祖釋之俾領其衆戰白溝河將右軍失利從克廣昌彰德進都督僉事以舊臣畧其過封思恩侯

祿八百石世襲指揮使永樂七年卒

明史

以下十二傳舊志均注陳州以代近易曉從刪

古朴字文質洪武中以太學生清理郡縣田賦圖籍還隸五軍斷事理刑自陳家貧願得祿養母帝嘉之除工部主事母歿官給

舟歸葬服闋改兵部累遷郎中建文三年擢兵部侍郎成祖即位改戶部永樂二年朴奏先奉詔令江西湖廣蘇松諸府輸糧北京今聞並患水潦轉運艱難而北京諸郡歲幸豐宜發鈔餉有司增價收糴減南方運從之營建北京命採木江西以恤民見褒七年召還佐夏原吉理戶部仁宗即位改南京通政使明年就拜戶部尚書出督畿內田賦師遼病命朴代之宣德三年二月卒於官初戶部主事劉良不檢乞中貴人求上考朴不可良遂誣奏朴罪朴就逮成祖察其誣得釋朴在朝三十餘年自郎署至尚書確然有守不通干請與右都御史向寶俱以清介

稱明史

盧勳字汝績博學邃經書洪武初辟舉任本州訓導以身率教

滿擢伴讀遷秦府紀善以直諫忤械送京師高祖釋之改江西

訓導典福建文衡與修永樂大典

孟鏞字宗器洪武庚午舉於鄉授湖廣道御史轉貴州道彈劾不避權勢爲公卿所忌永樂初按雲南見民舍灶突中白氣如蛇影上衝命人往視灶中伏火他日過又如之心竊疑焉乃默告曰如有寃當夢告是夕果一人跪訴吾乃李二大理人傭工王禮家因忤意被毆死瘞灶下歲久未白願明府察之翌日鏞往發果得尸禮伏罪人畏其神明卒以言事切直左遷大同府致仕歸

李珉字伯玉幼好學爲郡諸生洪武中御製大誥三篇頒行天下令師生誦讀歲丁丑珉以能誦大誥隨衆朝京師賜鈔遣還尋選補太學生宣德初拜交趾道御史按雲南及直隸所至鋤奸別蠱獎廉勤能辨寃理枉擢陝西僉憲有鯁直廉明之稱官至

都察院左僉都御史

閻昇永樂甲午舉於鄉授山西介休知縣居官不取一錢士民安之九載滿歸行李蕭然邑民爲立生祠祀之且呼醴之清者曰閻公酒云

于奎字伯辰永樂丁酉舉於鄉入太學拜陝西道御史兩按雲南熒酋有罹重典者遺以金寶奎斥之曰國法敢欺邪竟寘罪既按遼東秩滿外轉陝西按察司副使以內外艱兩補浙省副使紹白二郡有強劫殺人者誣援濟民奎悉直之無一濫及時人尤稱之

吳增景泰癸酉舉於鄉授福山知縣有異政嘗爲民禱之杲祠求海魚竟得魚以充國課禱城隍廟驅三虎虎去禱雨得雨旱不爲災邑人以爲精誠所感侈之詩歌比于魯蔡三異

王良臣字汝隣弘治六年進士授德清令以廉稱嘗積粟振貸民德之居四年召拜南京貴州道御史武宗卽位劉瑾等八黨竊柄陸崑等上疏極諫瑾怒悉逮下詔獄良臣時爲江西清軍御史聞崑等被逮馳疏救並逮下詔獄杖三十斤爲民居家讀書絕口時事後瑾伏誅良臣擢山東登萊青兵備副使時山東流賊猖熾良臣號令嚴明信賞必罰賊不敢犯遷山東按察使有暮夜餽金者置之法士民悚服良臣天性忠孝夷險不渝居臺諫時正直敢言及履外任清白自矢以齋表過家病卒

明史

何學禮字從敬幼聰敏髫年登嘉靖丁酉賢書任直隸甯晉知縣清介有惠政革除里弊歲荒設振活飢民數萬交水父老傳誦尸祝年七十九卒

陳朴字一初備干戶昂之季子習經史善文詞萬曆甲戌進士授

評事平反寃滯轉戶部主事管西太三倉盡革常例餘米幾四
千石不九已但存補陳困而散給之權聲徹軍伍更長于手奏
大司農論列悉屬起草尋有徐州之命告歸起員外轉郎中復
以病歸里再起楚副備兵斬黃值劉汝國之變調兵食設方畧
平之以功賞銀幣積勞致疾予告歸有以贖金六百進者不受
抵家築園種竹吟咏其間號竹墅居士尋以薦剡轉光祿少卿
不赴卒

張養志字子尚丁丑進士知唐縣政故爲閣寺掣肘養志御之以
禮無敢干者地蕪民疲爲課農桑完積逋暇則興文教其鄉始
舉一士尋改曹縣豪姓刁梗難治養志不怒而威刁豪帖然王
午分校東闈識蔡弼拔于若瀛於落卷士論服其藻鑒入爲御
史有直聲亦不毛舉細過臺中稱爲長者比督漕命下遘外艱

服闋陳請終母養家居十八年以溫純薦始就官再命巡漕所至風裁凜凜官吏肅然累遷通政使卒於京年七十三贈副都御史賜祭葬乘傳以歸養志正大光明上下推誠相與人有益必周恤故其卒也無論識與不識皆爲悼嘆立祠祀之其孫女適潁州劉壯國寇陷潁州罵賊投水死

季道統字亦卿癸未進士試庶吉士第一授檢討壬辰分校禮闈稱得士晉南京國子監司業肅規矩不率教者繩之士風丕變甲午上疏請復解額報可自成均舉者皆素所甄拔士以疾予告卒于荆山道中猶膺命徙北雍以左中允視事士人惜之道統酒酣文辭立就爲詩有盛唐音著有巖栖集秣陵草膾炙人口

雷恒字貞一登拔萃科廷試第一初判保甯多惠政徙辰州能剖

大獄時值兵譁恒鎮定之修築鎮單王會鳳凰等十三營哨邊垣三百餘里以禦苗患永順土司遺子女金帛叱却之陞本府兵糧同知歷署五十餘篆所至有聲尋致仕歸生平孝友端方以耆德數飲大寶崇禎年流寇益熾恒捐貲修敵樓二座壬午寇圍州城恒分守西門時年八十有四竭力捍禦城陷尋卒祀鄉賢

齊國佐字震一生而類異以孝稱萬厯乙卯領鄉薦除山東高密知縣勸農課土信賞必罰決斷如流清地畝均差徭利澤甚溥白蓮盜起單騎至營勸諭羣盜悉解散在任吏畏民懷巡撫薦稱治行第一

清

李皓字伍四順治庚子舉人授新野教諭陞河南府教授初值明

季寇難父養素守城以殉皓負母逃匿荒榛中覓遺粒食母亂定歸里得父尸葬祖塋結廬其側畫力田供母夜借書誦讀爲諸生設館二十餘年造就貧乏不取束金新野孝廉喬大任河南府進士張起鶴皆秉鐸時所成就性淡泊恥干謁事母孝年七十三猶深孺慕云

高維嶽字駿生康熙己酉舉人居里塾課諸生性剛方遇不平事挺身爲之申理濟貧恤孤借貸不責償康熙十八年出粟濟飢後知臨高縣民多流亡黎洞負固維嶽招撫安集百姓復業黎洞歸化興學立教三年風俗悉變未幾病卒

蘇名傑字漢三生而岐嶷才畧過人初知山東陽穀縣撫民禮士教養並舉振荒饑剖獄訟邑號神明逢聖祖南巡賜詩綾扇各一以旌之擢員外郎丁父艱回籍廬墓被溺而歿郡人嗟悼

孟調字覲之邑舊族性孝友所學以天人性命爲根柢而期於躬行實踐十六入庠雍正七年由廩生拔貢時詔舉學行有爲之士以總督田薦簡發山東知縣以下試用歷署招遠鄒平安邱等縣所至有政聲遇寒士尤多振拔十年以父母在陳情乞養大憲嘉其才弗許嗣聞兄弟相繼沒即日告歸以己子爲長兄嗣撫孤侄如所生凡所以慰親心者委曲周至父母疾籲天求代歿喪葬如禮廬墓三年家設塾多所造就嘗言聖賢精蘊先儒闡發殆盡迺取前哲微言奧旨與用功節目輯爲篤志編與子姪親爲講貫姪國彥國禧皆領鄉薦乾隆五年監修絃歌書院七年勸辦淮邑振務均悉心經理十九年恩赦錢糧調推廣皇仁免佃人稞租及歷年積欠爲貞女阮鄭氏請旌爲故人子徐廷友娶婦其他敦族睦鄰事難更僕數乾隆二十六年入祀

鄉賢

以上舊志

雷兼山字靜齋母早亡父患目眚購藥數百里脩滄務獲懽心家中落硯田稍裕輒分贍兄弟諸姪嗜書鬚而不倦潛心性理諸書八秩後猶有日記教養外孫李毓英擢英等宦成名立嘗偕山右常星五銀百五十兩置五旋里欲償未由後司諭鄆城如數出銀捐入書院而泐碑大書山西常星五名在鄆四次俸滿進士趙時熙舉人柴金坡趙時庚高攀桂趙保善副貢苗麒閣皆所成就武職陳國瑞一見執弟子禮監修鄆城黌宮捐廉五百金於節孝祠設立義塾出貲延師二十餘年如一日去鄆時復捐俸銀二百兩入城工鄆人稱之卒年八十八

項城舉人楊凌閣表其墓云公諱兼山字靜齋號西嶽原名澄江河南淮甯人原籍江西豐城自始祖諱寬公元季徙陳傳十三世至采章公乾隆辛酉科拔貢公大父也父諱季仲歲貢生候選訓導有子五公行四公之將誕也公父夢貴客來自稱江

總寤而公生因名澄江數歲授書聰穎異常稍長天性肫然循
循孝友事親從兄之外惟嗜詩書年十三能誦九經下筆輒千
萬言性喜詩賦文選子史擇其尤雅者錄帙盈尺十七入邑庠
始膺萃科又三年道光戊子始中試後以大挑二等署南陽訓
導適逢童試或謂此處案元向係教官說項藉可沾潤公厲聲
曰掄才大典關係非輕勿復言嗣選郟城教諭歷四任從學者
日衆殷殷誘掖其寒苦者月給膏火成就良多每考半門下士
爾時領鄉薦者六捷南宮者一近數科獲售者亦不乏人至印
結陋規絕不斤斤較量遇寒士不惟不取且多所與也俸滿升
南陽教授將去鄆出積俸三百兩以其半交邑宰爲捍禦資下
餘百五十兩捐入書院而泐山西常君星五名蓋常君曾在陳
開典舖公入都朝考時貸於常君旋里不復歸故以代捐
爲還項求無愧於心而已其蒞南陽也多士夙仰文名問字踵
相接公析疑辨難一如在鄆時後年老乞休回籍已逾八旬舊
時桃李紛紛請益而自行束脩者復歲有數人或以節勞勸公
曰吾自樂此不爲疲也公事親最孝母李太恭人早逝父季仲
公年老多病公曲得歡心分爨後以養親爲己任覲田所入胥
供旨甘每膳必親奉數十年如一日又嘗以事母未久爲恨每
讀刺藝至章雲李先生所求乎二句題文輒歔流涕不已
非至性過人能若是與公篤手足事兄惟謹長姪光輔幼失怙
恃撫如己出弟性嗜酒常不給公自給酒資並與田數十畝屬
其子分種同養暮年女適李氏家中落有子三人毓英擢英延
英以孤苦依公公置別院延師課讀旋謂孺子可教自行訓課

無書夜寒暑媿媿不倦未幾毓英中式甲子科舉人庚辰大挑
知縣分發江蘇擢英以癸酉選拔中本科舉人丁丑成進士延
英以縣試第一入庠爲增廣生論者謂衣鉢有真公外孫于雲
樓未經提命而私淑之於己酉膺萃科公幼時家本素封未冠
已蕭條賴舌耕稍形充裕而素性冲淡無所嗜好衣冠皆舊式
不敝不另置一羹數餐不下箸而於一切義舉不吝也嘗謂天
下之財祇有此數此有餘則彼不足先有餘則後不足如每餐
省數十文一月便得錢數千以之濟人在已無所損在人實有
所益吾之搏節豈第惜福已哉所居村西路最凹行人苦之在
卽時函囑族弟惟常代修橋梁費錢四百千在卽倡修城隍廟
出貲百餘千大成殿年久失修公慨然躬任出六百元立摺支
該處官幕落魄寄寓頗多公擇其尤苦者月給錢二十餘年其
每冬施貧民棉衣數百件於學署附近設義塾二十餘年其
種牛痘印善書施藥創惜字紙諸善事不勝枚舉蓋秉鐸時家
己小康歲所入俱送印所故得爲所欲爲彌留之際猶諄諄以
村北橋未修祖塋神道碑未立爲憾囑令喪葬從儉務成此二
端公晚歲家居日手一編帖括而外醫卜星相諸書靡不研究
人見其行不杖坐不倚燈下能作小楷率以爲常將有期頤之
望乃於光緒四年九月某日以疾棄世享年八十有八德配趙
太恭人孝慈勤儉常自行烹飪以佐養親先公卒子登瀛郡廩
生卒年三十二乏嗣女二長適商水候選從九品李公天章次
適同邑候選同知附貢生于公銳一承嗣孫殿會曾孫曰德曰
英曰祥閣於先生系附姻誼之末弱冠時嘗以文藝受業請見
每爲講名大家文諄復忘倦未幾而先生歿越十餘年閣始舉

於鄉以會試入都得識先生甥孫賞戴花翎太常寺少卿李子襄談次言於先生受恩最深親炙最久雖馳請封典未足報也

因畧述遺事屬爲文以表諸墓閣學識譎陋何足以闢幽光惟

幸列門牆其曾孫曰德又以狀來請亦不忍以不文

辭謹飾序其行事使後之君子尚有考焉

先正

清

萬如洛字滙菴祖世顯明進士南京禮部主事父巍歲貢生遭明季亂家中落貧不能給如洛七歲失怙弱且病欲讀書長兄止之兄歿後始下帷艱辛備歷志不少挫年二十三入庠後六年選援入太學性嚴肅雖盛夏衣冠危坐不少懈端謹廉靜城居三十年不一入市廛事母孝母偶不安雖盛寒不敢寢並廢飲食母卒哀毀盡禮父母忌辰必哭泣拜墓終其身更友愛館穀必分給兄弟長于詩古文詞初貢太學太守憐其貧遺之金不受窮約中怡如也著有香草亭詩京雒吟衡門集衡門新稿纂四書講義古今文未成卷帙而歿學者惜之

舊志

錢廷文字樸菴號柳圃廩貢生喜積書牙籤連屋學稱淵博詩古

文詞爲一時冠每脫縉士爭先覩時有錢才子之目敦倫立品
細行不苟郡憲崔邑令許吳胥重之競羅門下然非文字緣不
獲面其乙卯日錄事無不可對人言淡於仕進與張惕存太樸
楊儒夫立志結爲詩社家居設帳負笈者恒越境至睢州蔣金
門中牟倉聖脈皆選詞林劉欽和成進士于仲連夏丕昌王陳
舜劉樂澄皆登賢書其餘廩增指不勝屈母某氏通經訓善書
工詩有不櫛學士風故柳圃自髫髻詩文悉有家法祖母疾妻
萬氏嘗刲股以進刑于之化也著有柳圃詩集行於世

舊志

王永德字恒一號柳圃別號穢右居士少時慕上蔡去矜之言密
爲書紳故樸訥歛抑若不識字人淡於勢利食餼後累舉不第
泊如也貢成均亦不就銓咸同間詔舉孝廉方正者再皆固辭
居近郡治官吏希得見太康令祝瑛亭欲見不可郡守劉嘗稱

爲陳郡第一高人邑令焦贈額曰名教完人秘之不令人見家
貧授生徒循循善誘務爲平易近人不作高論遇貧者雖數年
不納其贄取與一介必嚴館白君崑珍家二十七年始終無絲
毫分外受嘗曰我於非分之求未嘗想過尤篤內行祖塋父嚴
事之各得歡心世業圃自館歸恒身父兄勞母病篤稽顙北辰
求代親歿歲入脩脯悉奉兄無一錢私其學先立乎其大而異
學不足以相消謙厚篤實德盛禮恭渾然無迹所謂實浮於名
者歟晚年學益精進恪守程朱於陸王不稍假借精研諸經儒
先等書尤邃於易嘗云易乃寡過之書讀之能寡過始爲有用
疾寢革門人問疾猶爲解曲禮之難解者平日專務闇修不矜
著述故終身僅遺稿數篇家譜訓言十六條歿後友人取之附
以語錄爲義石居士集一卷梓行郡人士鑲金泐石以表其墓

刑部主政項城余連萼撰文云先生諱承德字恒一號柳園淮
寓人祖興國好義樂施父金山有丈夫子四先生其叔子也初
業園年十二始受讀恂恂恭勤於學問有所得即見諸躬行
踰冠貧不能從師偕友讀書義陵之鐘樓罕有見其面者二十
六入邑庠旋食餼四十七貢成均不肯注銓咸同兩詔舉賢
良方正當事者欲以先生名上皆固辭居近郡治官吏希得見
太康令祝堞亭講學欲先生一見不可後會於鄰村別墅始一
晤焉郡守劉公嘗稱曰王柳園先生陳之第一高人也邑侯焦
公聞先生賢躬造其庭贈以名教完人匾額不以示人教生徒
循循不倦而未嘗強以所難爲學恪守程朱於陸王不少假借
諸經四子及儒先書多所致力而尤邃於易氏言易象靡不博
深後得折中述義二書讀之老不釋卷丙戌十月朔先生在館
阻雨展易讀之忽咯血兩稍歇急趨至家屬展墓雨驟至
先生力疾冒雨禮成而反病遂增劇猶與友人講論不輟疾革
氣絕復甦門人楊汝一在側猶與解曲禮之難解者夜半卒年
六十有六時光緒十二年十一月二十九日也先生天性孝友
祖壽高父嚴事之能各得歡心母以二月十日歿先生性孝友
初度後每遇是日輒哀痛不自勝家世業圃自館歸必爲父兄
分勞親俱殁歲入修脯悉以奉兄無一錢入私室平居自持以
禮取與之際一介必嚴館白君崑珍家二十有七年始終無間
言卒之歲豫支館金緡餘易簣時囑還之其他餽遺不宜受者
皆却之邑有餘生者冬無絮衣值院試不能出門戶先生倡同
人爲講衣俾入場先生竟以是獲售所學不事表暴而翕然尊信
人自悅服嘗取儒先書之精粹者各爲摘抄便記一卷手訂家


語一卷既歿友人取其遺文附以誦錄爲義在居士集一卷
陳孺人能相其夫前先生四年卒子男一學淵女一適陳氏以
十二月十五日學淵奉先生柩於義陵西數百步改陳孺人之
兆而合厝焉先生之歿也聞者莫不傷悼有泣下者而同鄉尚
學之士緬懷典型尤悵悵然失所依歸同謀鑲金立石以表慕
孫子立亭爲之狀吾友曹子泌泉不遠二千里厲書於墓求所
以不朽先生者夢不敏非其人也承吾友之命且與先生有一
日之知不敢辭謹按狀掇其節畧以復吾友並以告夫聞先生
之風而起者

孫舉海字立庭增廣生持躬端嚴篤信守禮嘗謂講學必本於敬
因號敬菴性孝友事親色養備至於兄弟推財讓產弱冠即志
聖學與王柳圃曹次梗諸子相友善所學益進洞見姚江之偏
極服膺胡敬齋之居業錄涵泳體行無間寒暑嘗言九思爲主
敬之本九容爲主敬之方又曰諸友甯攻我於生前勿議我於
身後言期可行行期踐言居恒勇於自治待人亦直言無隱授
徒先小學門弟子守其說不變值親憲日素服居外事師心喪

三年冠婚喪祭悉遵文公家禮學使邵劄明道書院延爲齋長
篤實任事開誠見心諸生或目爲迂要無不敬其爲人後館普
育堂義塾適陳屬大饑即稟請振濟振甫下而病劇譖語喧嘩
皆振事垂死無一語及其私年五十歲著有詩草一卷語錄一
册高年好歌一首

湖南刑部主政劉人熙傳云光緒丁丑河南大饑涂公宗瀛巡
撫是邦乞振無算事平以勸封所集振銀之美創普育堂於城
南收養貧民數百口立義塾二所越丁酉王芝祥以中書舍人
截取同知來省布政使額勒精額公委董其事芝祥以中書舍人
費不增而澤益普凡義塾子弟稍長則出塾量其才爲之謀生
業而擇其可爲儒者別立中學教之擇師得准其增生孫君舉
海字立庭師範端嚴士心悅服戊冬君以所業見示多省躬
克己勇於聞道之言余爲稍是正其不合者而錄其憂勤惕厲
四箴於册君衣冠拜謝交益親方冀析疑辨難昌明所學而君
遽以疾不起士友哀之未及下壽天何奪之速也君謂講學必
本於敬因號敬庵世居杜窪村家風樸茂孝友天豐事大父母
父母色養備至庭無間言於兄弟推財讓產極世所難處之泰
然惟曰難得者兄弟而已弱冠卓然即有志聖學與其友王柳
圃曹次樞楊伯漢仲唐兄弟善所學益進洞見姚江之偏極服

膺胡敬齋之居業錄手抄口誦靡聞寒暑於孔門極契仲子而
喜於聞過亦同嘗曰諸友寧攻我於生前勿議我於身後自治
勇而待人亦直言無隱與之交者皆畏而愛之禮之廢久矣君
獨勇而行之授徒先小學尤拳拳九容九思忌日必哀素服居
於外事師之心喪三年除夕過我留飲不飲日先師某之喪也子
弟及冠必前期筮賓不以菲廢禮居喪不以酒肉待客爲人治
喪亦然期功總麻皆如禮學使卹因二程祠創明道書院聘院
長湘潭黃君專講伊洛之學特調取入院爲齋長君推本素志
力挽頽風諸生或目爲迂未嘗不敬其爲人曰篤篤實任事開誠
見心未有如孫先生者就其所至而論之可謂篤篤信守禮之君
矣子



仕蹟 文職

北魏

袁翻字景翔項縣人

時淮陽
更名項

父宣有才華爲劉彧青州刺史沈文秀

府主簿皇興中東陽州平隨文秀入國而大將軍劉昶每提引
之翻少以才學擅美一時初爲奉朝請景明初李彪在東觀翻
爲徐紇所薦彪引兼著作佐即以參史事及紇被徙尋解後遷
司徒祭酒揚烈將軍尚書殿中郎正始初詔尚書門下於金鏞
中書外省考論律令翻與門下錄事常景孫紹等入預其事後
除豫州中正嘗議明堂辟雍又議選邊戍事遭母憂去職熙平
初除冠軍將軍廷尉少卿尋加征虜將軍後出爲平陽太守翻
爲廷尉頗有不平之論及之郡甚不自得遂作思歸賦神龜未
遷冠軍將軍涼州刺史時蠕蠕主阿那瓌後主婆羅門並以國

亂來降朝廷問翻安置之所翻表論得失朝議是之還拜吏部
郎中加平南將軍光祿大夫以本將軍出爲齊州刺史無多政
績孝昌中除安南將軍中書令領給事黃門侍郎與徐紇俱在
門下並掌文翰翻既才學名重又善附會亦爲靈太后所信待
是時蠻賊充斥六軍將親討之翻乃上表諫止後蕭寶夤大敗
於關西翻上表請爲西軍死亡將士舉哀存而還者并加振資
後拜度支尚書尋轉都官翻上表願以安南尚書換一金柴時
天下多事翻雖外請閑秩而內有求進之心識者恠之加撫軍
將軍肅宗靈太后曾燕於華林園舉觴謂羣臣曰袁尚書朕之
杜預欲以此杯敬屬元凱今爲盡之侍座者莫不羨仰翻名位
俱重當時賢達咸推與之然獨善其身無所獎拔排抑後進懼
其愛己建義初遇害於河陰年五十三所著文筆百餘篇行於

世贈使持節侍中車騎將軍儀同三司青州刺史嫡子寶首武

定中司徒記室參軍寶首兄叔德武定末太子中舍人

簡魏善本傳

宋

謝文瓘字聖藻舉進士爲大名府教授元豐中御史中丞黃履薦爲主簿遷考功右司員外即時議建廣武四埽石岸黃流湍悍役人多死功不可成而使者申前說愈力文瓘條列利害遂罷其役徽宗立擢給事中後入黨籍帝披籍曰朕究知文瓘本末命出籍乃以爲集英殿修撰

宋史

金

郝九齡登進士爲宛平令莅政寬和吏民悅服卒官歸葬于陳子謙爲陳臺潁川管民總管行軍元帥

明

馬嵩字仲岳中宣德壬子鄉試明年登進士授大理評事聽獄持平投福建僉事以豪猾猖獗累謫廣東新村司倉轉定陶縣幕仲寃理枉處決如神隣邦有不平者咸赴訴焉天順改元復原職改陝西甯夏糧儲軍民感頌在陝三年死之日道路爲之嘆息

劉清天順乙卯舉人成化間授平陽縣才智警敏勤於政事邑介千戶所軍校橫暴清痛抑之民之豪奸聞風遁跡邑人稱令之立紀綱者自清始

平陽志

劉一清成化癸卯鄉薦宏治初攝山西陽城教諭正身率教以矩矱約束諸生九載不倦尋陞黎城知縣亦有循聲

謝孟金字子純十四補郡庠癸卯以春秋魁兩河明年成進士授兵部職方主事累官本司郎中籌策悉當大司馬謂有謝安風

會嚴嵩當國官以賄遷孟金毅然不爲動尋備兵蘭州飭守申儲恤軍整伍邊賴以甯有鋤貴戚杖妖僧却玉餽禱雨澤請異績比調楚參藩留贖金五千兩助邊不入私橐還山東按察使以河西侍御某不協遂回籍兩臺交薦皆不起隆慶初大臣舉之改隴右少參轉楚省副使會病瘵而辭尋卒孟金居鄉治家有禮法族黨稱之

劉淳字自裕嘉靖壬戌進士授工部主事分署荊州秋毫不染改吏部考功累遷文選即疏請廣文無官守概得任本省從之嘗爲例計吏有以玉飾象簪授者卻之而抑其人尋爲太常少卿淳既廉介有萋斐之者出爲陝西少參遷憲副不就曰吾生也有涯宦海無涯疏請歸卒年四十七多著述藏稿于家卒後繼室魯氏殉之別有傳

張廷槐字孟卿甫四歲父鳳階口授書輒記憶聖髻爲文有奇氣
領丙午鄉薦選署內邱司諭教士先行誼士習丕變嘗卻修儀
助貧不能葬者乙卯分校蜀中稱得士擢雞澤知縣務教化覈
查鄉賢名宦旌表孝子節婦興學校勸鄉約汰浮華治痼疾其
整飭類如此屬久旱民疫焦勞廢食禱雨再注疫亦甦臺使交
薦而槐性耿介嘗以廉隅忤上官意有寄物者卻之自知不爲
所容以疾歸士民環泣遮轅爲立祠歸後囊無餘貲詩酒自娛
而終

朱嘉臣字調元少以文章意氣自豪有文武才善射柘寇師尚詔
亂衆逃匿嘉臣獨糾衆赴之賊聞風引去爲諸生聲名籍甚七
舉不倍以貢授應山學訓歲飢捐金易粟三百石振貧生調南
樂學諭識魏氏允貞允中允孚兄弟勵以學並登高第改授

學擢知藁城縣以疾歸尋卒允中銘其墓曰才不盡用譬之驥服鹽車無所見其千里士不逢時大都如此哉

徐貞字復元嘗繼劉姓更名思溫成進士知南和縣丁嗣父艱服闋補陽城縣振飢有方民歌德之

宋一韓萬歷壬辰進士任漢中推官晉兵科都給事立朝忠直每疏論時事切中利弊號爲諫垣鳴鳳見藝文志

楊鎮原萬歷己未進士授陽城知縣遷戶科給事中轉山西河東副使凡所建白帝皆嘉納居臺諫敢言爲當時士大夫所推

崔源之字士本幼失怙恃鞠於季父曲陽令應夏戊午舉於鄉天啟壬戌登進士初授工部營繕司主事買銅鑄錢修造戰船節

省數十萬上嘉賚焉時魏闖竊權部即趨附有一二年中至尚書都御史者魏敗前後四十餘人皆抵法惟源之六載即署不

遷公論推重陞大名知府虜寇逼近源之修城濬池火藥器械莫不預備陞薊州兵備累陞山西右布政會推巡撫延綏右副都御史時榆林軍餉缺源之智撫恩結雖調發不時士卒無怨西陲晏然惜軍務內多掣肘不克展用壬午告休不允癸未復懇辭予告歸居林下十餘年卒

萬世顯字克生崇禎甲戌進士初任元城縣丁父憂服闋再補山東章邱居官潔己愛民峭直不避權貴陞南京禮部儀制司主事

清

季之駿道統孫明崇禎庚辰進士順治丙戌任戶部主事授南昌知府政事文章並有名海內著家乘萬餘言邑人宗之

季一德字純如由諸生貢入太學初任偃師儒學陞萊陽知縣潔

已奉公勤教養慎刑獄康熙五十五年運餉至郭多里窮荒絕域往還萬餘里由此致疾告歸卒

辛永和字柳聖十歲能文年十八入庠旋食饒中順治丁酉科舉人訓授生徒敦士品尚實學門人吳方胡會圖吳庸敬李若楠等皆以文學孝義著士林則之授山東鄒平令聽訟明決棍徒歛迹革除重耗吏役不能爲奸邑紳王姓宦他省虧帑二千餘金永和代之償勸課農桑振興學校善政在人耳目鄉人尸祝之以疾歸里居有聞望兩舉鄉飲大賓年八十四卒

朱巽字斗瞻爲諸生時有盛德以薦貢任武陟教諭再補孟縣教諭陞繁昌縣爲政敏捷案無留牘宣城民婦以真命沉寃蕪湖民以墳山結訟累年不決中丞委勘一訊而白居十年擢蒲州知州履任時積逋不施鞭扑蒲民完納又鹽引積累爲捐俸償

之在任五年告歸卒葬之日蒲士民來陳哭墓者數百人以子
鴻緒贈奉政大夫鴻緒字森菴號松亭由貢生授揚州府同知
興利除害民呼爲朱青天丁父艱將去士民籲請在任終制大
吏不可鴻緒尤切止之衆爲之罷市者五日比行送舟蔽江幾
不得前服闋補建昌府同知擢鳳陽知府遷福建臺灣道尋改
汀漳道罷任清釐江南遺賦事竣授吏部考功司郎中復知順
德遷湖廣鄖襄道歷改廣西右江道直隸霸昌道服官二十餘
年以年老歸

萬如濟字禹滄世顯孫年十三喪父奉母王氏備極色養時家中
落十六始折節讀書二十一補博士弟子康熙壬午登賢書己
丑成進士知開原縣開故邊徼地瘠民貧運賦千百餘家濟詳
請豁免民困以蘇其所興革務合人情遷戶部四川司主事未

蒞任卒居官八載囊橐蕭然著述見藝文志

蘇名庭字綸掌以能書名早游泮司鐸郊縣遷貴州施秉知縣邑當孔道地瘠民貧往來供支不勞民力以病予告卒于家

蘇名勳字彤獻貢生授柘城教諭擢直隸唐縣知縣歲祲出倉穀減價平糶民賴以濟子牙河決捐俸造水車百兩放水歸河磨民無水患鹽驟貴民苦之急令平價以便民才能大著累遷主事員外郎雍正癸卯發川省以知府用召見時賜克食奶茶貂皮勳即日就道抵川委辦打箭爐糧務合上憲意補順慶知府受事後釐剔弊端嚴革重派三載卒于官親歸士民瓣香泣送至今德之

蘇名弼字梅峯弱冠入庠貢太學循例授湖南瀏陽知縣多善政受知上官丁父艱旋里廬墓三年服除再補廣西陸川縣邑有

十八堡三十六墟冬季貨集無論紬布米鹽等物在墟市易者
富豪十取其三名曰抽墟名弼詳請勒石永禁陸民感之年踰
六十告歸家居嘗捐資助振州牧黃旌曰豈弟長存八十六歲
卒長子銑例授縣丞次子鉉別有傳次鈐次鑑俱見選舉

查舊志無蘇鉉傳或蘇鉅之誤

孫常字大年康熙己卯舉人庚辰成進士除湖廣棗陽知縣邑近
山谷多盜常廉得實悉置之法乃滅火耗革陋規民大悅服擢
吏部文選司主事累遷驗封郎中因前回事被議冢宰保留之
壬寅改文選郎中以父喪歸服闋再補考功郎中京察時各部
院卷案叢集冢宰悉委任益矢公慎常列優等第一奉命盤直
隸倉卻饒遺在部時定禁陝西私錢稿上嘉納之傳示九卿科
道曰凡爲國家辦事當以此爲法丁未揀發雲南補永昌知府

賦稅繁冗苗民雜處乃立定額除濫征土司餽遺一介不取撫
綏三年循聲大著總督薦授驛鹽道章未下而卒土民苗蠻泣
送有至百里外始返者弟西字二山康熙庚子舉人歷任直隸
新城定興赤城等縣所至有惠政上憲嘉其能以疾歸年八十
餘卒子彥穎由貢生任湖北均州知州亦清慎有父風

高培字仲益明敏有幹濟初知福建建安縣有德政遷雲南曲靖
同知兼理黑鹽井提舉再署趙州篆戒奢清弊商民饒裕遷鎮
沅知府府新設裸性難馴雍正十年裸忽變將寇鎮沅衆惶懼
培曰守死殉難吾分也爾等任所適衆感泣誓守裸聞有備而
退後歸林下十餘年壽八十卒

季進德字翰如以明經任山東福山令委滕縣振濟進德捐貲以
助遷江西廣信府同知值上饒十三郡民變臺憲將發兵勦捕

進德以數騎入山諭服之尋擢潞安知府多善政未幾罷歸居鄉恤鰥寡濟老幼鄉人德之早失怙恃每念不及祿養涕泗不輟兄一德寔官萊陽歲必往視其天性之篤如此子綰另有傳
細亦出仕

宋廷贇字錫召康熙丁酉科舉人家貧親老閉戶寡夜筆耕養親無不如志設帳里門先德行後文藝每講習必究聖賢心地反覆指示竟日徹夜不辭勞裁成多知名士甲子舉人于鏡武解元白九如皆其及門其他入庠食餼不可枚舉後宰廣東徐聞縣延名師設義塾徐多荒田給民牛種開墾以爲子弟入學之費俗刁健訟贇綜理庶務盛暑汗流竟體不休甫半載士習民風翕然丕振以積勞卒于官囊空無餘上官嘉其賢助金二百餘櫬歸徐民泣送者數百人子一鵬哀毀逾禮未數月卒陳人

聞者無不流涕

王宗禹字德先幼穎悟爲文輒驚人與孫常徐伯子師事貢生陳恪年十八學使拔冠軍食餼於州十試不售貢成均授內鄉訓導內鄉百餘年無甲科禹蒞任講學論文無虛日丁內艱歸諸生楊維翰楊建勳負笈從請業維翰登賢書建勳亦拔貢成均內鄉文風由是不振尋補洛陽訓導再署鄆師亦諄諄以學行爲勗未一載卒於官

吳竟成字復可貢生授永城訓導性耿介却貧生禮訓迪多士有方捐貲修學宮薦擢江南太和縣知縣未赴任卒

張體銓字子衡乾隆丙辰進士幼力學家貧嚴冬以草裹足後授山西稷山知縣適鄰邑萬泉饑民食穀情迫有洶洶狀府憲猝以民變通報有旨勒兵臨萬泉闔邑將陷重典體銓力爲昭雪

所活無算解組時百姓遮道哭聲振野有送至百里外者

方鳴球傳云公諱體銓字子衡選園其號也生有至性事父魁
英公暨母王孺人曲盡色養以菽水承膝下歡迨事繼母劉孺
人亦不虧孝德劉孺人愛如已出公天姿英敏干言立記於子
史百家無所不窺作文沉厚雄偉堪與天崇諸大家並席立志
拔俗不治家人產業嘗與同懷兄講論經術指畫千古得失因
慨然曰吾輩生當太平徒沾沾於文字中揆華擣藻不能為天
地立心生民立命直與未讀書等年十九補博士弟子員旋食
饑越十年登雍正丙午賢書益復枕藉鴻秘獻酬古烈又十年
成進士為丙辰河南省元歸而講學不倦郡守金公重其品延
為絃歌書院山長實心誨迪士多沐浴化泊筮仕山西稷山縣
乃直隸絳州屬甫下車改弊除苛寓嚴於寬胥吏如立冰上青
疇綠野隨處歌慈母焉會蒲州府萬泉縣饑民食穀情迫其
不獲者在府憲前如有洵洵狀府憲遽以民叛過報柄政者據
報奏聞天威赫然賜果毅誦公以上方劍勒兵以行欲盡法
誅之誦公抵萬泉設壇而坐排左右露白刃蒲守與萬泉令已
就縛先加激民叛者以罪而叛民可立誅也萬泉與稷為接壤
邑公悉萬泉民無叛意因躬款誦公願以身保誦公怒按劍曰
之益力自朝至日中往復辨論侃侃不屈誦公怒按劍曰公曰
汝以劍起獨不畏是耶眾皆魚愕雞睨舌橋不能下公正色曰天
乎誦公感誠懇意稍釋遂以公署萬泉事限五日清賦一清誦
才並試萬泉民也公推誠撫字平其瘡痍未五日欠賦一清誦

公聞之色喜曰信哉萬泉民果非叛也微張令幾乎誤可大用
不次超擢在指顧間公虞不久爲大吏所容以病告歸惟一
葉空囊以清白遺子孫而已卒年六十有二公敦行孝友重然
諾尚氣節家貧硯田自養備廩之餘並以贍親族固之其生平
好義根于至性類如此論曰寒儒讀書半生諒能以所學自負
一旦掇青衣紫躬膺民社豈有不負所學者公一介作稷山
獨能俾鄰封萬千赤子既不死於歲又不死於兵此中作用知
從真讀書煅鍊而出公嘗言爲天地立心爲生民立命跡其活
萬泉邑衆一事已不負此兩言矣人或以用不盡其學爲公惜
雖然公之學亦何可沒哉

季綰字丹錫號鳳章潞安知府進德長子乾隆丁巳由明經援例
授山西朔州有政聲朔處晉北當春風狂沙簸夏則雨雹爲田
廬害綰至事神保民邑不告災者七年旋以疾歸甲子補原缺
歲旱禱雨卽應歸化城有犯擬流綰得情力爲昭雪後升福建
邵武府同知俗悍鬪刁訟力挽頽風士民稱頌母老陳情終養
家居多義舉母歿哀毀過情不數年歿弟緇以通判揀發雲南

補廣西通判運銅赴京大吏嘉之署開化府後因被議旋里壽

七十八

孟國彥字潛修號慎齋幼耽古家設塾多所成就爲從叔置田宅爲世母營喪葬鄰里鄉黨急者周之乾隆庚午舉於鄉甲戌擢發江蘇以知縣試用署高郵州除陵民政及去任有攀轅泣下者後改濟源教諭士林重之

李啟明字東曉號峻峯領庚寅鄉薦文少有奇氣繼乃歛才就法以先儒語錄爲宗遊京師謁竇東臯先生即席次韻深見契名益噪孝廉張次仲歿于都下攜其柩歸年六十選汝州學正思以一官榮親蒞任三載旋告歸里中有經師人師之目

王天爵字元良讀書目數行下年十六遊庠旋食餼事母以孝聞選涇川學博倡立義學鬻產爲諸生膏火值匪徒張仁滋事設

策弭平大憲才之欲擢知縣以母老辭俄有怪狀如人形浴
呼嘯天翁祭以文怪遂絕有諸生爭產訟于庭反覆理論生感
泣晚年告歸有著作見藝文志今子孫書香不絕

鄧玉麟字繡紱祖克長父裔曾以忠厚世其家玉麟丁酉拔貢由
庫議叙分發江西歷署萬安永新吉水縣及九江府通判綽有
政聲丁父憂去後揀發浙江補布政司經歷力持廉慎及歿宦
囊蕭然弟玉相字蘊輝工書畫由廩生考授州吏目分發甘肅
借補肅寧典史士民德之議欲建生祠亦以父憂去職嘉慶四
年揀發四川大經畧勒公器其才擢給五品頂戴因解西藏軍
餉歿于巴塘

高量字雅涵由拔貢應試北上同人祖帳量引司馬題橋故事指
其門曰不取青紫不入此門尋中庚申恩科舉人教習期滿分

發安徽以知縣試用歷署建平英山盱眙等縣試士卷悉親校
告歸後家無長物
以上舊志

王驥衢字頡雲號筱圃經史淹貫尤嫻詩賦十七遊洋旋負餼七
膺房薦中道光乙未副車父患目青聞襄城有金針撥雲術往
求阻水涉滅頂援木以濟己亥秋闈主司選元魁搜檢遺卷得
驥衢文喜曰此其是矣有貽我干將親拂拭夜來虹氣貫重霄
之句遂擢第一人司訓原武以事罷旋奉毛欽使檄辦邑東北
路團練叙功給光祿寺署正銜秉鐸許昌立梨花社督課論文
是科獲捷四人嗣授陝西鄠縣令建書院減差徭表節孝顯碩
德拓養濟院歲饑振濟收遺嬰僱乳媪哺之庚午癸酉兩充陝
甘鄉試同考官房薦多名下士左相宗棠奏以直拔升用服官
二十餘載家無私蓄著述甚富見藝文志子四長鍾洵次鍾瀚

江蘇候補通判次鍾淦次鍾漢庠生鍾海字靈川性落爽工楷
法應童子試學使評曰字冠閣府兩取份生憤甚納粟九成均
以縣丞銜請纓營務保用知縣歷署成都奉節清溪通江樂至
太平等縣黎庶感戴立去思碑曰惠澤長流兩袖清風年八十
四卒鍾洵子二長毓棠陝西布庫大使工畫次毓棟善書早世
胡鳳岡字懋官年十三通五經中咸豐辛亥舉人軍功保薦教諭
與弟龍岡倡修萬全寨同治壬戌成進士以知縣簽分雲南嗣
捐知府改省湖北充甲子秋闈同考官事竣赴荊州鞫獄該屬
松江茲枝江以水田互訐案久不結鳳岡一判而解大憲深器
重之擬畀繁缺知府遭讒僅予簡差後不復仕主柳湖書院講
席十餘年無隻字干有司同年何宗師金壽督學來陳數邀弗
往時論高之詩文著作悉燬兵燹壽六十八

崔德昌字善卿號止齋咸豐戊午科舉人大挑二等選儀封鄉學正性伉爽家貧設教於及門知無不言言無不盡交友率真尤篤倫紀與兄析居後兄數破產輒復合炊在儀封署兼理民詞有孟姓被訟執金私謁嚴却之頃城王丹君論人少許可獨心傾焉講姚江學有著作見藝文志

趙家璜字渭川同治壬戌舉人揀發貴州知縣六年權開州篆務歷任安順府通判在州試士所拔首卷章士鴻秋領房薦前茅王家均中殿榜於貴筑廣順貴陽等處閱卷拔十得九廣順案元趙潤秋即中式是科充貴州鄉試同考官房薦之士九毅二十一人備卷十九人多名宿一時文名洋溢咸服藻鑑官有政聲惜失考茲於其家書中檢得之

李鍾璧字蒼寶貢生司諭涪川候選知縣少孤奉母食必親進母

疾奉湯藥衣不解帶以母善病精習醫術鄉里有疾求罔不應
諭洧川時嘗有鄉民延診方接上官急往治之豫撫英桂母病
延醫立愈謝金不受同寅請託正言謝絕未嘗以私事謁吳咸
同間捻匪臨洧晝夜守城積勞成疾卒於官諸生扶柩至里製
德教碑

白玉璽字澄一歲貢生歷署西平光州上蔡蘭儀等縣訓導好治
道路嘗設宣講社救難恤貧推食解衣不可枚舉鄉人頌曰樂
善不倦壽八十一封奉政大夫長子桂星字步斗同治壬戌舉
人司諭密縣保升知縣次桂芳字滌凡廩貢生同治間匪徒李
如松等襲攻尚店隨郡守劉拱宸泰謀往勦滅之保六品銜授
武陽訓導三桂清軍功保用守備四桂麟字厚趾廩貢生司訓
洛陽光緒丁亥河決境內大水隨郡守吳築堤辛苦不辭里人

贈繩其祖武匾額

李樹培字仲植號耐村性穎異五齡口授毛詩即求解弱冠領於庠同治癸酉登賢書舌耕養親淮太諸生多被裁成名藉甚士林稱羨司訓滎澤門多問字民有冤累力爲解救閭里贈額以頌撫憲倪擬薦知縣辭不受光緒間辦河料蒙獎六品頂戴十三年河決鄭口管理工料出力賞五品銜歲歉族鄰來糶乞貸悉厚遣之姪孫留署教養併贍其家族叔清潔亡於任所營殮返櫬值省假司諭劉某詳革諸生四人培還任劉去力爲開復老病告歸嚴冬於各寺廟中尋丐施粥鄉里稱焉卒年七十六子保毅保泰保善皆業儒

齊油然字從善增貢性剛直處事公正爲人排解無算治家嚴肅嘗以昭烈勿以善小而不爲勿以惡小而爲之二語訓子孫咸

豐庚申擒匪猖獗覲察委辦團練獎五品藍翎同治戊辰署
新蔡訓導課諸生始終不倦貧乏者不取脩脯光緒丁丑卒於
家壽五十二

智殿邦字子藩以拔貢朝考任魯山教諭值歲饑出俸振濟多所
全活汝州副學張病故署內殿邦奉委兼理適當歲試文武諸
生印結盡歸之張以篤寅誼尤工書士人求者踵相接年五十
終於學署胞弟二興邦字啟運靖邦字宇熙均以廩貢候選訓
導家居授徒成就後進甚夥



仕蹟 武職

漢

朱鮪莽末兵起鮪從更始拜大司馬後與河南太守武勃共守洛陽光武將北兵徇燕趙以寇恂爲河內太守拜馮異爲孟津將軍統三郡軍河上與恂合勢以拒鮪等異乃遺李軼書勸之降軼報異書異見其信效具以奏聞光武故宣露異書令鮪知之鮪怒使人刺殺軼由是城中乖離多有降者光武卽位遣大司馬吳漢等圍洛陽鮪堅守不下帝以少彭常爲鮪校尉令往說之鮪曰大司徒被害時鮪與其謀又諫更始無遣蕭王北伐自知罪深彭具言于帝帝曰夫建大事者不忌小怨鮪今若降官爵可保况誅罰乎河水在此吾不食言彭復往告鮪卽面縛詣河陽帝卽解其縛令彭夜送鮪歸明旦悉其衆出降封扶溝侯

後爲少府傅後漢書各傳節文

晉

鄧遐字應遠勇力絕人氣蓋當時時人方之樊噲歷冠軍將軍數郡太守號爲猛將襄陽城北沔水中有蛟常爲人害遐拔劍入水蛟繞其足遐揮劍截蛟數段而出枋頭之役免官尋卒甯康中追贈廬陵太守

王瑚字處仲少重武節成都王穎舉兵向洛以爲冠軍叅軍積功累遷游擊將軍與司隸滿奮河南尹周馥等俱屯大司馬門以衛宮掖時上官已縱暴瑚與奮等共謀除之反爲所害晉書王隱傳

五代唐

符存審字德詳初名存少微賤嘗犯法當死臨刑因主將愛妓言以善歌得不死其後事李罕之從罕之歸晉晉王以爲義兒軍

賜姓李氏名存審從晉王擊李匡僞爲前鋒破屠唐關又從擊
王行瑜破龍泉寨以功遷檢校左僕射從李嗣昭攻汾州執李
唐遷左右廂步軍都指揮使又從嗣昭攻潞州降丁會從周德
威破梁夾城遷忻州刺史蕃漢馬步軍都指揮使晉趙攻燕梁
救燕擊趙深州圍蓼縣存審與石建塘軍下博擊走梁軍遷領
邢州團練使魏博叛梁降晉存審爲先鋒屯臨清莊宗入魏存
審殿軍魏縣與劉鄩相拒於莘西從莊宗敗鄩於故元城閻竇
以邢州降乃以存審爲安國軍節度使毛璋以滄州降徙存審
橫海加同中書門下平章事契丹圍幽州是時晉與梁相持河
上欲發兵兵少欲勿救懼失之莊宗疑以問諸將而存審獨以
爲當救曰願假臣騎兵五千足矣乃遣存審分兵救之卒擊走
契丹從戰胡柳陂晉軍晨敗亡周德威存審與其子彥圖力戰

暮復敗梁軍於土山遂取德勝築河南北爲兩城晉人謂之夾
寨選內外蕃漢馬步軍總管梁朱友謙以河中同州降晉梁遣
劉鄩攻同州友謙求救乃遣存審與李嗣昭救之河中兵少而
弱梁人素易之且不虞晉軍之速至也存審選精騎二百雜河
中兵出擊鄩壘佯敗而走鄩兵追之晉騎反擊獲其騎兵五十
梁人知其晉軍也皆大驚然河中糧少而新降人心頗持兩端
晉軍屯朝邑諸將皆欲速戰存審曰使梁軍知吾利於速戰則
將夾渭而營斷我餉道以持久困我則我進退不可敗之道也
不若緩師示弱伺隙出奇可以取勝乃按軍不動居旬日望氣
者言有黑氣壯如雞鬪存審曰可以一戰矣乃進軍擊鄩大敗
之鄩閉壁不復出存審曰鄩兵已敗不如逸之乃休士卒遣裨
將王建及牧馬于沙苑鄩以爲晉軍且懈乃夜逸去存審追擊

于海河又大敗之張文禮弒趙王王鎔晉遣閻寶李嗣昭等攻之至輒戰死最後遣存審破之存審爲將有機器大小百餘戰未嘗敗衄與周德威齊名德威死晉之舊將獨存審在契丹攻遮虜乃以存審爲盧龍軍節度使時存審已病辭不肯行莊宗使人慰諭彊遣之莊宗滅梁入洛存審自以身爲大將不得與破梁之功怏怏疾益甚因請朝京師是時郭崇韜權位已重然其名望素出存審下不樂其來而加己上因沮其事存審妻郭氏泣訴于崇韜曰吾夫於國有功而與公鄉里之舊奈何忍令死棄窮野崇韜愈怒存審章累上輒不許存審伏枕嘆曰老夫事二主四十年今日天下一家四夷遠俗至於亡國之將射鉤斬祛之人皆得親見天子奉觴爲壽而獨予棄死於此豈非命哉崇韜度存審病已極乃請許其來朝徙存審宣武軍節度使

卒于幽州臨終戒其子曰吾少提一劍去鄉里四十年間取將相然履鋒冒刃出死人生而得至此也因出其平生身所中矢鏃百餘而示之曰爾其勉哉存審三子彥超彥饒彥卿超爲汾州刺史郭縱謙弒莊宗明宗入洛陽是時彥超爲北京巡檢承王存霸奔於太原彥超見留守張憲謀之憲儒者事莊宗最久不忍背恩欲納之彥超不從存霸遂見殺明宗即位彥超來朝明宗德之勞曰河東無事賴爾之力也以爲建雄軍留後遷北京留守徙鎮昭義罷爲上將軍復爲秦寧軍節度使又遷安遠彥超主藏奴王希全盜其貲彥超稍責之奴懼夜叩其門言有急彥超出見殺贈太尉彥饒爲汴州馬步軍都指揮使天成元年發汴兵三千戍瓦橋關控鶴指揮使張諫爲亂殺權知州高述迫彥饒爲帥彥饒陽許之曰欲吾爲帥當止焚掠明日以軍

禮見吾於南衙乃陰與拱衙指揮使龐起伏甲於衙內明日諫等皆集伏兵發誅諫等殺四百餘人即日牒州事與推官尋儼明宗下詔褒其忠畧其後累遷彰聖都指揮使歷曹沂饒三州刺史清泰三年自饒州刺史拜忠正軍節度使侍衛馬步軍都指揮使晉高祖起太原彥饒以侍衛兵從廢帝至河陽廢帝敗晉高祖以楊光遠代彥饒將親軍徙彥饒義威軍節度使范延光反自奉進以侍衛兵三千屯滑州兵士犯法奉進捕得五人其三人義成兵也因并斬之彥饒怒明日奉進從數騎過彥饒謝不先告而殺彥饒曰軍士各有部分義成兵卒豈公所得斬耶何無主客之禮也奉進怒曰軍士犯法安有彼此且僕已謝過而公怒不息欲與延光同反邪拂衣而起彥饒不復留之其麾下大譟追奉進殺之彥饒不之止也已而屯駐軍將馬萬等

聞亂以兵擒彥饒送之京師遂以彥饒應延光反聞行至赤岡高祖使人殺之下詔削奪在身官爵彥饒與晉初無釁隙以一旦之忿不能馭其軍殺奉進已非其本意以反見誅非其罪也

五代史

清

錢騰雲字映斗貌若蹲虎能開十石弓又雅善書法明末中州盜起撫軍高明衡辟爲泰軍裨統兵征河北陰募壯士作馬賈裝入賊營市馬縛其魁張天則等兩河平高公特薦都城已陷明年太傅王之綱開幕府薦雲於豫王指畫機宜豫王大悅授以淮海副使順治乙酉舉鄉薦己丑成進士庚寅授江南鷹揚衛守備衛故衝劇監督有方糧艘先期抵通繼奉令轄四十衛運務復先期至無有侵耗監修和州烏江渡焦湖堤不乘不蓋工

程堅完民賴安堵總漕蔡公論功優叙加三等陞湖廣全省都
指揮使朝命釐定官職改爲掌印都使司恭遇覃恩授階昭勇
將軍誥封祖考如官蔭一子入監讀書壬寅山西寇李來亨游
魂蜀楚五省會勦雲轉輸糧糗三百餘萬石民不困役事平錄
軍功五溪蠻覃印昌等侵施州監利田數千頃民愬於朝委雲
勘鞫令苗毀民券絕侵佔之根復疆理之舊苗民帖服癸丑吳
逆叛全楚騷動藩臬缺官以都閩攝方伯事王師雲集議戰議
守刑兵錢穀日戾不遑越明年己未又署理巡撫事大將軍順
城王知其功題補荆岳水師總兵晉贈榮祿大夫賜正一品服
色因火藥局災調江西副將以年老告歸年八十一歲卒子巍
業字鶴皋以父蔭入監肄業期滿授廣東長樂縣知縣剛直不
阿謝絕請託民有孝肅之歌丁艱歸里服闋補福建甯德縣知

縣滑吏歛迹調臺灣縣知縣以慙直不合上憲意遂解組歸仲弟萬選有文武才善射工書中順治甲午武舉乙未進士任江南潁川衛守備季弟騰鳳中順治丁酉科武舉姪若水任德興縣知縣

劉三省素勇健從提督卽征吳逆接戰七日未嘗火食權授轅門千總徵兵河南三省過里門不入私室主帥嘉之授千總以親歿子幼歸里尋卒

邢鉞順治丁酉武舉以防禦守彝陵吳逆叛隨營征討斬獲甚衆紀軍功七次以孤軍入其巢被虜脅降不屈賊囚之獄中有小卒餽以食得不死乘間逸出并帶所虜官吏楊又芳等二十三員士卒百餘斬關逃回主帥壯之復命討賊擒叛員歸錄功題陞未受秩而卒

蘇名卿字价藩康熙甲子武舉潼關衛守備興學校勸農桑獎節
孝立義館辛丑歲大歉斗米直白金兩餘大興等寨數千民置
裝欲逃名卿留之而倉廩空虛乃解囊撥戶口各給兩月糧民
始安籍丁酉閩邑民變調兵勦捕其民扶老携幼男婦雜踏叩
關籲求者數千人本道恐有不測閉關不納名卿惻然力請開
關安置按戶給糧數月閩邑平乃令歸籍治潼關十八年政修
化洽民皆稱爲蘇召杜後衛缺裁告歸紳民擁送百里外洒淚
立碑誌甘棠焉

張顯秀康熙己酉武舉初任四川會鹽營守備征苗有功累陞漳
州營都司歷官三十餘年勤敏稱職在任時歲饑捐俸振濟存
活甚衆遇修橋修學事皆解囊助之年老歸里八十五卒長子
純仁中康熙丙子武舉

陳標字允式號和菴中乾隆甲子武解元甲戌科進士引見以待
衛用賞戴藍翎歷任廣州都司吳川游擊陞崖州叅將值黎峒
滋事檄委進勦足被傷力疾追擊未半載奏捷擢香山副將大
憲以龍門要口近接安南奏請將標調任歲饑軍民乏食標以
工代賑大憲嘉其能交章薦簡浙江定海總兵兼署提督嗣臺
灣逆匪作亂標領舟師梭巡海島匪不得蔓土民德之入都陛
見登奉溫旨因足疾屢請假不准乾隆五十七年得告歸尋卒
嘉慶時經部咨查列入國史

王思用爲人謹厚武畧過人中乾隆己丑武舉從事戎行值山東
臨清州逆匪滋事屢建大功曾不火食者七日主帥深嘉獎之
任信陽州千總

王威字振九武畧過人壯從戎捕襄城紅石關盜平山東臨清州

賊有功歷任扶溝淮甯鎮平經制外委事母必以甘旨嚴冬無
裘母憐之言血氣方剛如是而後體適所至緝捕有聲士民勒
碑以頌並立生祠祀之

黃文錦字繡章少有志畧中乾隆戊申武舉五十六年經兵部揀
選分發本省撫標効力嘉慶元年湖北白蓮教滋事隨巡撫景
防邊勦賊有功奏賞藍翎補撫標右營千總又隨提督慶將軍
承兩湖總督倭在湖北東陽之迴龍寺竹谿之九里崗屢著勞
績因受傷奉檄回豫擢守備旋陞荆子關都司後調任襄城十
七年有旨升廣西提標游擊引見賞換花翎嗣陞撫標參將二
十二年護越南國貢使進京回任傷發以疾歸道光五年修邑
乘文錦勦事採訪最廣或與談從戎舊事輕裘緩帶有儒將風
踰年歿鄉里惜之

以上舊志

蔣宗孟字浩然號亞儒嘉慶甲子武舉己巳進士花翎侍衛任湖南長沙協中軍都司歷陞綏靖鎮標中營游擊岳州營叅將訓練士卒保衛一方有萬姓干城之望偶膺腿疾告歸卒于途子士昂家貧苦讀入庠食餼隱居教授多所成就後進賴之

嚴立名字震字千總銜陳州營經制外委任項城沈嘉慶初隨撫鎮出師靈寶湖北南漳盧氏鄖陽及道口滑縣等處身被重傷以屢捷膺薦壽六十一歲子長學深次學海候選典史三學淵陣亡另有傳

傅金麟字騰輝道光辛巳武舉投効出力授湖南長沙營守備卓著戰績陞鳳凰營都司署鳳凰左營游擊髮匪之亂迭次戰賊克捷嘗被困累日不火食止啖玉瓜一枚以勞致疾告歸休養

勸辦治城防守事務監造火鎗二百餘桿築巡警房數十所得
資捍衛年六十餘卒

劉慶雲道光甲午武舉乙巳進士點御前侍衛選貴州石仟府都
司隨貴州提督孝巴勸辦營務屢著勞績咸豐己未署貴州安
義鎮標長壩營游擊永安協鎮時回匪圍困長壩營慶雲奮勇
率先擒匪受傷創據殞命十一年經貴州恭府稟請勘合一道
載柩回籍

王崑崙字奇峯中道光己亥武解元聯捷進士擢御前侍衛乾清
門行走二十三年授山西澤州府都閫以功遷山西潞安府游
擊髮匪之亂戍黑谷口鎮守七年盪平寇氛遷太原府恭將咸
豐五年豫魯江南一帶捻匪肆擾隨軍帥倪將軍邱自西勦賊
連追七日夜至老虎坡邱公陣亡崑崙奮不顧身携胞姪振清

追殺王貫三擒匪三千餘人匪首小反王張龍李虎東山王西山王龔瞎子張樂行苗沛霖等盡行誅戮咸豐十一年陞副將任山西蒲州協鎮積勞告歸休養林泉卒年六十九

趙瑞雲字丹光號韻樓優廩生工書得米南宮體幼孤克執喪如成人事母廸忱色慕病致憂喪致哀兄弟五人垂白無聞家聲自父鵬程有善人目瑞雲衣德罔替於戚族多周急遇寒儒恒延至家塾玉成之適之郡聞有良家女數人鬻下流急贖育及笄胥爲擇配癸巳邑大饑捐粥振二千金蒙獎議叙鹽運司知事納贖晉員外郎籤分兵部在官不尚徵逐獨與袁端敏倭文端深結納嘗條陳裁汰綠營事宜當事韙其論卒格議不行迨洪楊亂起人咸服先識公餘即與倭文端講性命學立功過格以相最文端嘗以畏友稱之旋補武選司歷充馬館監督武會

試校射官僉擬超擢以假旋卒詩尤名雋惜未成帙子二長書
林增生早世次銘恩幼承父志有小善人之稱道光河決碣西
瓦罐坡太平集通陸不車獨力築複道十六里建大橋費踰千
金遇荒資給流民無所吝嘗全活路姓母子陳姓夫婦爲毛姓
兒完婚後以開買魯河首輸千緡膺獎鹽知事援例入正郎家
居孝義卓著亦克有父風銘恩子六長立善出嗣次立言並見
選舉立善子鴻洞有至性年十六母梁氏卒悲哀不入水獎四
日成服慟絕復蘇不離柩側者二載比葬訖自守墓所日夜風
雨哭不絕音家人強之歸不能留復之墓數月竟以哀殤聞者
惜之

董蘭芳同治壬戌武舉乙丑進士以花翎頭等侍衛供職京師歷
著勞績授山西游擊旋以積瘁歿於王事

牛瑞麟字翼臣從軍門程勦髮逆又奉少司寇袁飭勦張總愚首
冒矢石身被數創賊蕩平以功保千總拔陞左營中哨正哨官
勦江淮土匪保加守備銜幫辦老強左營軍務及承平奉督憲
劉札留守臨淮關督工防匪六載駐守兵備道任深賞之竟以
腿疾假旋壽終子文昭候選縣丞

未仕而有武勳者附

趙桂林字馨一青雲子隨父官武昌有大役必侍左右因通武畧
侍父疾衣不解帶者八月服闋援例捐游擊捻匪起捍城輸餉
復辦城守總局兼保衛兵差釐金諸要公時匪踪倏忽桂率勇
警備恆十餘夜不安枕東西爐尚店兩次用軍需餉繁急獨力
籌辦六夷重之屢登剡章賞花翎副將銜至築城浚池修養陵
關帝城隍等廟皆身董其役庚午府憲蔣重修試院浼督工事

南斌卒年四十子東魯候選知縣

郝克慎字明德業儒善武咸豐初皖匪肇亂協鹿人魯士雅招集團勇禦寇咸豐六年鹿令顏召平剿皖寇抵亳夜擒匪劫營與練長梁燦並魯士雅率團百餘入譚頗歸醫以功獎五品藍翎王化龍字躍衢邑廩生素有武畧充王營營長同治元年二月隨軍帥勝保襄辦營務刺史張杏林於魯臺東戚窪遇賊被害時賊據胡橋化龍協武舉王效倭率團數千人與戰殲渠魁殺賊數百名奪獲旗幟賊遁杏林子樹建詣求父屍化龍助尋之乃得殮葬後樹建治亭額其門曰義高元振

袁萬里字鵬程精武力咸同間擒匪據劉橋口圍難民急萬里戰敗百餘騎多救出者又攻臨河寨瀕危匹馬隻鎗直入賊衝賊退閭寨無恙

齊煥然字遠耀武庠生例捐千總幼閱三國志即喜武畧有豪俠
風咸豐六年捻匪邊馬竄至邑東戴家集治城戒嚴人心惶惶
煥然糾合同志武生高占魁陳登高武舉高萬清等率鄉團數
千人禦賊至臨蔡城見賊烽徹天各有退志煥然奮呼曰軍行
有進無退死生命也衆遂進賊聞風繞走鄉間獲安是時煥然
以鄉團行無紀律恐擾居民有不法者立叱咤之既歸失音者
累日遂成廢疾不復出子楷之另有傳斌之增生

淮陽縣志卷之十

傳 人物上

孝友

家

樊可行陳人五世同居劉閭亦州人聚居至七百餘口累數百年

咸平中有司請加旌表從之仍蠲其課調

宋史

元

邵敬祖宛邱人父喪哀毀廬墓母繼歿河決不克葬殯於城西敬祖露宿依其側風雨不去土人哀之爲縛草舍在焉前後屢廬六年兩髀俱成濕疾至治三年旌其家

元史

明

羅迪都字夢菴幼穎悟十歲通沈韻工近體弱冠食餽天性孝友

世有宅二處田一頃其父視迪都才常語人曰此子他日必不恃家產迪都即以田宅讓昆弟丁卯登賢書辛未中會副絕意進取依依承歡身自浣膺子廣韻已卯復登賢書家稍給辛巳歲歉待以舉火者二十餘家居父母喪哀毀過禮葬歛皆獨力兄弟死爲之棺斂又以已產給諸姪乙酉冬大風吹折屋椽瓦獸迥都謂廣韻曰吾其不久乎未幾以疾終祀孝義祠

田腴庠生流寇掠陳境腴扶父吐華東走至郭河寇驅逼將殺之腴曰寧及我勿傷父寇感其孝父子並得免腴子多祚薦明經牛龍韜武舉父斗垣州庠生年七十餘病不能行崇禎辛巳流寇突至龍韜負父以行賊逼前將及斗垣龍韜曰父辱子死何用生爲持鎗刺賊韜二字憤激各持棒豎之賊退免於難

胡驥母石氏病忽思鹿脯不可得驥剖胸前肉代之即昏憤忽雷

雨及門而甦及烹肉有異香母食之愈後父傲病醫欲知糞甘苦驪嘗之語醫一劑而愈州牧戴昕親禮其廬勞以羊酒

劉民祿登孤母顏氏孀居四十載撫民祿成立年至八旬病不起民祿貧不能備藥餌僅供饘粥目不交睫衣不解帶者三月及篤割股進食病瘥少延旋以衰老終葬後廬於墓卽州守王旌之入孝義祠

彭修丙庠生王衍祚庠生王汝進俱割股奉母今入祠

陳繼商庠生事親孝父歿哀毀骨立廬墓三年夜有羣盜過其廬相語曰勿驚陳孝子郡守監司優禮之及卒仍致奠

郭圍國廬墓膺獎劉仲式衛養智俱廬墓入祠

陳第剖冰得魚愈父病胡貢之庠生兩臺旌孝沈九成醫學旌孝

義給冠帶俱入祠

清

趙國用字朝選世居山東鉅野縣明初遷陳明季闖賊屠陳國用方八歲扶母逃亂廬於墓侍母疾累月不解帶母歿與妻陳氏茹素終身族弟國泰國安避亂流離收養之並爲威寧國用夫妻皆壽逾八十臨終囑子孫曰吾父母早逝未得盡養負罪多矣吾死喪祭勿豐以重吾罪今其子孫猶遵遺訓

李若楠皓子字南伸工舉業入泮第一中康熙癸酉舉人敦孝友重任卹父宦遊時若楠居家奉祖母盡孝後知江西長甯縣父歿服闋將補官不忍離母遂不仕外大母年老無子楠迎養以悅母志母歿哀動鄰里家事必聽命于兄分產時兄已故莊田讓弟姪撫育族子課讀以成其名宗族死者經理其喪嫡叔進學年十歲遭寇死亡後爲廣西全州叅將後人占籍廣西若楠

訪知亟通音問終以不得一見爲恨雍正庚戌叔之曾孫宇達
赴試禮闈紆道旋里若楠已患疾不起執手永訣其孝友實天
性也

雷顯宗字鳳羽明建文時殉難南京前軍都督敬之後曾祖恒辰
州府同知祖惟謹父宏俱賓鄉飲宏子二顯宗其仲也入庠後
肄業太學大司成孫岳頒器重之考授縣丞不仕性至孝父病
癱手足俱廢顯宗常就榻前演說忠孝以博歡心復手煖其四
肢歷二十七晝夜而愈後父病劇焚香籲代父歿哀毀骨立母
喪廬墓五年家故饒良產多讓兄族子麟少孤無依育之成立
康熙己丑大饑捐粟濟貧代償千餘戶逋賦助婚葬者二百餘
家李榮貧甚思鬻子女以養母顯宗爲贖歸時給布米立義塾
以教閭里施藥療貧捐地掩骼率以爲常奉旨建坊旌表一時

文人詩歌以紀其事稱梅隱先生卒祀忠孝祠子三長方運次
方奮方曉方奮字驚泉候選州同以親老肩家政好周族黨每
歲暮必以錢物資貧之年二十八卒人多勸之方曉善承父志
張乾名家子夔甚曉委曲提攜汪晰有九喪未葬出二百金助
之顯宗常喜曰此吾家堯夫也方奮子衣德候選鹽運司運同
許永祚長祚母顏氏病危思食羊肉時值五月徧索不得永祚等
各割股合餅以進母食之病愈州牧李旌之曰孩童愚孝永祚
中康熙己卯科武舉

劉發康熙戊子舉人曾祖附名祖瑞邑明季俱殉難父早卒母田
氏遺腹生發撫之成立登賢書例得爲令以母老辭不就雍正
七年州牧舉人才以發應又固辭從弟蘇二歲而孤發撫養維
謹居平好排解濟貧弱佃僕以索逋與人爭發自引咎謝之越

明年其人如數償不受糶穀入社倉其好義如此

徐鐸字覺斯候選州同性孝友父卧病鐸侍湯藥衣不解帶者三年歲饑鐸爲社正捐銀散穀設厰放振存活甚多有張氏鬻友三載持原價請贖鐸不受厚贈遣歸之

高有恒字聖思附監生少孤築室墓旁春秋祭奠嗚咽不已母王氏晚年病常依膝下談往事以悅母志母每爲增食母歿勺水不入口者三日慟輒嘔血數升光州王起鳳携子居陳不得歸鬻子於有恒有恒焚券還其子代償鳳通併給歸資故吏目張罷職徙涿州眷屬羈陳七年有恒竭力周恤寢疾猶囑子昆常給之嘗舉約正有搆訟者得一言即息鄉里咸推重之

李作臣字振九性孝友父母相繼歿哀慟幾絕兩弟俱幼一弟襁抱乞鄰媪乳哺之適妻郭氏生子作臣喜遂與己子並乳始得

成立怡怡友愛終始無間族黨盛稱之子世俊登丙辰武闈孫

彭庠生

聞方震字驚伯孝友性成父遊江南病還震嘗糞以試甘苦繼母宋氏性嚴能得歡心父歿第六惟次弟方起成立餘俱幼震營產業條理秩然延師課諸弟皆成名析產任弟擇取後有蕩業者割已田與之子建章太學生次采章拔貢生

蘇鉅貢生好讀書事親孝母疾藥劑需河水鉅日赴沙河汲之往返百里晨出暮歸不憚瘁母疾遂痊教長兄孫三人脩脯膏火悉自己出十餘年如一日以勞致疾易簣時泣囑子灑曾善事祖父母言訖而終

劉燦字質菴歲貢生幼孤事母曲體親心母疾親嘗湯藥嚴寒不入寢室母卒哀毀盡禮伯兄早逝以膏腴與姪並讓產仲季族

黨婚葬不給者罄囊助之無德色晚而好學取古今格言條列
座右以自警

勞宏業幼聰穎十四入庠父故業貧土成墳遇風雨即涕泗嗚咽
母疾奉湯藥晝夜侍榻前母幾期頤業年七十尙依依膝下以
娛母心母歿號泣幾絕友愛諸弟一堂怡怡延師課讀並列膠
庠年七十六卒

程法孔事母孝母歿獨居柩旁三年出入必告康熙辛卯州同吳
元錦旌曰孝德可尙年八十七卒

陳爾澤農民父早卒事母孝母偶不悅長跪請罪務得歡心母歿
哀毀踰禮棺殮不假諸弟力嫡姪維翰貧無子給養三十年捐
修本村圯廟凡有稱貸皆不責償孝德善行里人稱之

雷瓊明辰州同知恒曾孫庠生振祚子年十二父病脾泄瓊嘗之

以告醫晝夜籲天父病頓愈及長父命分居瓚以美屋腴產讓
兄怡怡無間姪適黨釐居無子瓚爲立嗣併布粟供之歲饑出
貲周貧交友張學挈家來投爲籌居處服食十餘年無德色子
方來字九皋康熙丁酉武舉工書畫善騎射父好客小飲或至
終夜來與弟方性侍側不怠母命僕代之不肯去父母歿以美
宅讓弟自關涉囿於沙澗與舅張漁涓課讀其中張有學行甥
舅相尙以道遊其園者目爲煙霞中人

徐之馨五歲而孤事母極孝母與言父事即涕泗橫流母歿哀毀
盡禮嘗以魯氏家規訓其子伯牙事亡如存舅氏貧老無依奉
養終身歲歉濟貧族黨賴焉

王國祥庠生聰穎過人父患癱晝夜榻前扶持每引述古說以娛
親或負出庭外承色笑歡如是者十餘年父母歿喪葬如禮諸

弟議分爨祥曰此祖父遺產當分諸姪爲生計余硯耕自能給
乃立家塾訓其子姪來學日衆貧者不受賃時給食以成就之
李帝培候選州同母早背逢母難辰不食父患癩疾侍左右不離
親友婚葬事偶一出雖遠必歸父卒廬墓三年諸弟皆幼治衣
食成室家兄弟怡怡老而彌篤七十四卒

高啟祥歲貢司訓滑縣勤課士貧者助資士人德之尋以養親告
歸孝養備至從姪三人產盡各給地百畝賦仍代納親族告貧
不能償置勿問暮年遭親喪哀毀過禮勺水不入口者累日以
此致疾卒

胡一德增廣生好讀書事親克供子職父年九十一德侍杖履弗
懈母病床褥七年奉湯藥維謹兄弟同爨五十餘年內外無間
言嘗修堤禦河患一方賴之晚年退居鄉里開家塾日翕受齋

淮陽縣志 卷之十
士資斧不給者佐膏火焉

張邦棟監生母故事繼母潘孝家無間言異母兄弟同居弟亡撫其孤如己子輿論美之

馮修倫字天爵性孝友侍親疾衣不解帶者彌月親歿哀毀骨立遇忌辰輒嗚咽流涕與弟同居至老無間言析居獨取瘠田或勸爲子孫計倫慨然曰手足至重田產身外物耳吾子詎不能承吾志耶衆皆服子炎邑庠生

王君美農民性至孝母病危欲食肉君美密割左股作餽飽以進母食之遂愈

魏燦字光斗父患風痺日侍榻前四肢無溫手暖之三年不懈疾乃瘳母目盲燦以舌舐之越四月目能辨色弟歿撫姪如所生濟困扶危族黨多被澤者卒年八十四

張木字閣章廩生事父母以孝聞弟本早歿遺子三樂甫三歲三
復遺腹生木撫之教養備至嘗謂三樂曰爾讀書無成吾無以
見爾父於地下言訖潛然流涕後三樂由廩生中嘉慶己卯副
榜

王方旦字旭齋庠生方張字景師增生父有痰疾母失明方旦與
弟朝夕扶持身親匪懈親歿絕意進取家設塾來學者多所成
就性交愛與弟同居至白首門內怡怡如也方張性嚴正見躡
足附耳者恒恥之晚年精岐黃多所全活嘗力援許氏孤兒鄉
黨稱焉子孫書香不絕

楊東來字敏修庠生有至性嘉慶九年父歿未葬逾年園中火起
東來跪伏柩前火益熾或扶之出慟哭不起燬屋三十餘間盡
爲灰燼惟是屋獨存子凌雲郡庠生

李進孝農家子父疾聽醫家言嘗糞可知生死即就糞嘗之父歿
不櫛髮及葬廬墓負土營塚者二年子殤棺甫出即赴墓服闋
後族黨強之然後歸與祭輒號泣壽八十餘

劉天才性孝友嗣父永吉疾晝夜奉侍日不交睫父母歿盡禮盡
哀事本生父母亦敬奉不懈同堂兄弟貧時周恤之并爲延師
課諸姪姪女字陳貧不能娶天才陰助之鄉黨稱焉

智夢雲字華毓附貢生父歿哀毀備至每念祖父創業艱難飲食
服御務崇儉約弟早亡撫姪如子故人子徐體元歿爲撫其孤
卹族黨不少吝自言平生所佩惟孟子三自反仲山喜聞過及
動心忍性數章壁間懸范魯公誠姪詩馬伏波訓子書俸子弟
觸目自警孝廉郭鶴齡贈詩有家規繩後輩身範繼先民之句
子四湛洽廩貢生淡監生阜庠生

以上舊志

聶森泰字茂林性至孝家貧早失怙事母祝賣卜奉養定省無缺
自食粗糲甘旨奉母有聘教卜者以母老辭母故殯葬如禮人
多助之邑侯羅額曰孝堪風世入忠孝祠

唐巨峯字峻極拔貢生爲文沈摯與弟義峯字鍾蘇歲貢生皆有
學行履規蹈矩以孝友著父培彥郡庠生早亡祖父母老祖父
明扶持俸養先意承志冬寒被冰恒身溫之事寡母劉善體親
心克盡子職鍾蘇多病峻極調養備至壘篋諧和終身如一日
邑中士人無遠邇皆稱唐氏昆仲

張百密字致詳廩生家貧父早亡事母必奉旨甘遇異味先取遺
母然後食曰母嚮未之嘗也偶有失母雖切責無愠色鄰崔廷
鏞令金山累聘之皆辭終守陋巷以事母

張鼎新字應魁增廣生讀書求心得講學躬行爲本謹素履非公

不主卑以自牧下問不恥家居奉親克篤孝行母有不悅嘗作
嬰兒戲以慰母心云

傅廷掄字殿選號槐圃從九品父勲字心齋孝友謹厚以刻苦攻
書致疾早卒掄甫三歲幼苦成人值父忌日悲不自勝事母善
承色笑母或盛怒掄至輒怡奉養食品必手飪以進捻匪之亂
携母避難雖倉皇未嘗缺旨甘母老患弱夜臥榻前視聲息奉
起居衣不解帶者九十曰焚祝跪禱願減算十年以益母壽母
享大耋及卒寢苫柩側斂葬竭力次姊適常家中落瞻養終身
園租夙負不追償里有爭端力排解之卒年七十六子二弼兒
選舉登監生孫凝釐監生師範畢業疑穀中學畢業凝祉監生
李雲漢字天章邑庠生性醇謹動循規矩父歿事母有孝行母善
病冬怯被寒與弟雲嵐迭以身温因母疾致齋虔禱同絕肉味

者十年五世同堂不聞有睚眦語設塾三十餘年不計貧傭及門多列膠庠子金銓姪金丹皆庠生壽七十餘既沒門人建碑以誌德教

于雲驥字凌閣恩貢生幼授書項邑高侍讀釗中之門工楷法以第一人入邑庠逾年偕兄雲衢同補廩餼既貢成均署獲嘉教諭士林咸欽佩驥篤內行生母劉父統三皆早世自痛親恩莫酌奉嫡母蔣曲意承歡事長兄尤翕睦持家勤慎公廉同居百餘口胥混想言在署三月少許俸餘猶守同財之誼不入私囊子五長秉虔秉信秉政秉廉見選舉秉元監生

曹萬紀家貧幼孤昆仲四人紀性孝友常曲處三弟以博母歡紀業工每外出必囑妻善事母及歸務市甘旨供養終母生以爲常同村曹若柵以孝登聞邑侯焦額曰純孝性成

曹桓性剛敢爲同治四年擒匪東歸隨父保善避難抵柳林寨北
遇匪保善被掠桓奮不顧身持鎗戰賊生奪父出受傷夜卒

單忠字誠齋幼失怙依母成立孺慕終身年踰五十母歿哀毀滅
性每餐垂涕俸饌跪獻如生日數月而卒

張申字孝恭慷慨有至性咸豐己未九月聞警避難於臧家集寨
寨破負母潛逃賊忽追至申曰莫傷我母賊舍母竟殺申里人
哀之刊石以誌其孝

楊明義字心齋家貧性孝咸豐間擒匪猝至負母抱子過涉以逃
勢急棄子負母奔城匪去子浮無恙人爭傳之

蘇永豐字本天性咸同間擒匪突至堅守老母不忍去賊逼母前
以身護之遂遇害

田三俊字傑一事親孝父患痢恐污褥撥之以手捻匪掠境負母

避亂母曰我能行可携爾子俊難之乃棄子負母逃匪擄子去
歲餘子亦生還

顧玉樓字霓仙母患瘋奉事湯藥不解衣者五年親卒兩弟俱幼
王家政二十餘載無私蓄一門藹如析居良田讓弟胞叔貧其
養葬之光緒三年歲饑出穀三十石以贍貧次子富春入邑庠
劉鳴岐字鳳舉十四喪父事母奉養周至愉色婉言以悅母心母
病湯藥必嘗無間晨夕及歿三日歆粥漿米不入口夜臥柩側
晝不出廬百日內形如枯木延醫診視曰不可爲矣竟以毀卒
鄉鄰哀之

晁聖古字加詳天性至孝咸豐間匪亂與母避難暮失於途冒險
衝鋒於火光中尋見之奉歸母子俱全聖古八十二

謝泰和弟春和幼孤兄弟友愛以事其母咸豐八年兄清和避亂

湯河屍弗得泰和春和慟欲絕以母老秘不使知後母微聞泰和與弟相戒勿言易戚爲懼以慰母心母享壽

丁永錫字孝普父廣林癱瘓臥床出入背負十餘年不懈地租負欠弗較生五子二女十三孫一庭歡洽人謂孝德之感

李曉君字國猷性純篤事母膝有至行母病臥床二十餘年終日奉事無稍懈母卒喪葬盡禮時以孝稱

邱文宗字守憲早喪母庶母賈撫之旋又喪父事庶母如所生寢膳盤匱恪盡子職賈病奉起居嘗湯藥不離床褥鄉黨稱爲孝可風世云

張華才字俊卿幼從項邑楊凌閣遊授正誼堂書徐有悟曰人道盡於是矣事親必得歡心助許姓婚濟蔡姓貧某佃盜錢被獲羞甚華才宥之秘不告人丁母艱哀毀踰恒因致病將革歎曰

母喪未終嚴親在堂死有餘痛宜墨經入殮以示罰語畢而卒
李清來字廷聘太學生性孝友母癱年餘晝夜坐臥榻前扶持之
延醫不憚千里母歿哀毀盡禮析居時凡物任弟擇取疾篤作
家訓以誡子孫長子嵩齡增生

張源緒字法文邑庠生昆弟三人緒爲仲子弟早歿兄秉家政積
數千金及析產盡歸兄自得薄田數畝食指日繁飯疏衣做二
十餘年無怨言

焦守先字同孟咸豐間避難倒栽槐寨寨破父亡冒矢石奪父尸
還從堂弟二相亦遇難撫其遺孤從堂姪曰明貧延師課之入
邑庠

戴成法字憲章六歲失怙母常患目眚家貧行乞供養阻雪不能
出成法泣曰人有親皆能養我何一寒至此哉乃苦力耕織積

數年家漸富孝養更篤有甥失恃被繼母逐收養成入遣歸之
族女喪父母無依撫育爲擇配歲時歸寧如已女焉壽八十六
龐珽黼字稗普邑廩生幼篤至性年十三遭祖父喪能隨喪大
年不離柩側事祖母于昏定晨省備色養母李病垂危籲天祈
代與兄璵黼友愛尤篤推梨讓棗怡怡無間璵黼亦以孝友稱
同受業於孝廉夏耀榮楊凌閣王鍾浚拔貢唐巨峯以致本勵
行相勗共期達到竟均早世時論惜之

李培基字養源庠生嗜學而孝父患弱醫云須稜方可瘳基購之
弗獲乃截指和藥以進

李法事母至孝母患喘欲食肉法爲割股以進

鄭天太性愚而孝母病醫藥罔效自割其肉以俸焚祝籲天願夏
綿冬單以延母壽

何廷掄有孝行母錢氏患目眚服藥不應割股以供母啖
王暹祥字瑞徵父病篤呼地籲天願以身代自割左臂鬻之

忠烈

唐

李肅字行中陳州人以功封田王建中時天子幸奉天叛將午氏
閉關據閩天子賜肅弓矢命之曰閩粵弗庭汝實征之肅率精
銳數萬至臨汀浮流猝與賊遇兵不繼力戰而死屍浮水上彌
月不變鄉民詹糾憫肅忠勇歿而祀之有禱輒應貞元十五年
有司以聞勅封孚佑廣烈王以妃陳氏配享今廟在永安縣曰

唐田王廟

延平府志

趙犖陳州宛邱人世爲忠武軍牙將犖資警健兒弄時好爲營陣
行列自號令指顧羣兒無敢亂父叔文見之曰是當大吾門稍

長壽書學擊劍善射會昌中從伐潞州收天井關又從征蠻忠
武軍功多遷大校黃巢入長安所在盜興陳人請節度府請擢
爲刺史表於朝授之既視事會官屬計曰巢若不死長安必東
出關陳其衝也乃培城疏塹實倉庫峙藁薪爲守計民有貲者
悉納之繕甲兵募悍勇悉補子弟領兵獲果東奔賊將孟楷
以萬人寇項擊禽之僖宗嘉其功累遷檢校司空巢聞楷死
驚且怒悉軍據激水與秦宗權合兵數十萬繚長壕五周百道
攻之州人大恐掣令曰士貴建功立名節今雖衆寡不敵男子
當死地求生徒懼無益也且死國不愈生爲賊乎吾家食陳祿
誓破賊以保陳異議者斬衆聽命引銳士出戰屢破賊巢益怒
將必屠之乃起八仙營於州左僧象宮闕列百官曹署儲糧爲
持久計宗權輸餉仗軍需賊益張掣小大數百戰勝負相當故

人心固乃問道乞師於朱全忠未幾汴軍至壁西北陳人思奮
雙引兵急擊賊破之圍三百日始解中和五年擢彰義軍節度
使巢雖敗宗權始熾畧地數千里屠二十餘州唯陳賴肇獨完
以功檢校司徒加泰寧浙西兩節度皆在陳并領之龍紀初進
同中書門下平章事忠武軍節度仍治陳州流亡踵還與弟昶
至友愛後將老悉以軍事付之乃卒贈太尉肇悉忠力以孤城
抗賊巢卒敗亡然附全忠亦賴其力復振故委輸調發助全忠
常先它鎮云昶字大東神采軒異而內沉厚有法度破孟楷功
多巢之圍昶夜擷師疲而寢如有神相之者黎曙決戰士爭奮
死鬪禽賊酋數人斬級千餘肇領秦鞏以昶爲州刺史檢校尙
書右僕射當時方鎮言忠壯吏治舉言肇昶肇之老乃授留後
遷忠武節度使亦留陳進檢校司徒勸勸農桑於人有恩惠加

同中書門下平章事乾德二年卒年五十三贈太尉準子瑀字
有節雄毅喜書善騎射巢之難激勵麾下約皆死以先冢邇賊
畏見殘齧即夜縋死土取柩以入庫有巨弩機牙壞不能張瑀
以意調治激矢至五百步人馬皆洞賊畏不敢逼以勞加檢校
尚書右僕射遙領處州刺史昶帥忠武瑀遷行軍司馬昶之喪
知忠武留後政簡濟上下安之全忠義爲忠武軍節度使陳土
惡善圯瑀疊覽表塘遂無患三加檢校太保光化二年同中書
門下平章事進兼侍中封天水郡公按鄧艾故蹟夾翟王渠慨
稻以利農一家三節度相繼二十餘年陳人宜之天復初韓廷
帥忠武以瑀知同州節度留後昭宗還長安詔入朝賜號迎鑾
切臣以檢校太傅爲右金吾衛上將軍從東遷歲餘以疾免卒

年五十五贈侍中陳人爲罷市

新唐書

宋

謝貺陳州人宣和中爲駕部員外郎知汝州欽宗時上封事十篇論事切至使金遣提點京西北路刑獄金人犯汝州貺自襄陽領兵往援戰死

宋史

金

李夷字子遷後名佖字季武陳人出兵家喜讀史書究古今成敗尤喜武事精習兵法擊劍馳射累舉詞賦不中後以武舉進身夷爲人介特貞祐末渾源劉基爲陳幕一見喜之爲延譽諸公聞後爲昧知幾雷希顏所重東方豪俊推以爲冠後遇陳州陷死之年四十二

明

雷敬字肅公陳州人明初定鼎金陵所至響應陳守將左君弼拒

守太祖以書招之不報時敬在左幕中告以天命有屬無自苦以害百姓洪武元年徐達取陳州敬偕守將歸附以武功翊運授指揮僉事建文朝官前軍都督領禁軍燕兵陷金川門敬率所部力戰死之子六長子昇龔龍驤衛指揮諸子悉居陳

孫紹武陳州衛指揮使正德庚午守信陽獲劇賊趙天錫周學等辛未流賊之變紹武守沈邱衆寡不敵城陷戰死其從子郡庠生璉知紹武勢孤自備弓馬往助同死難帝嘉其忠廕世襲都指揮僉事

姜宏陳州衛指揮同知正德辛未流賊陷郡邑宏守汝寧追賊至確山之韓莊死於陣帝嘉其忠命子孫世襲指揮使韓莊人立祠以祀稱曰姜將軍廟

徐時彩有膂力善騎射中崇禎丙子武舉官信陽州守備丁母憂

居鄉闖賊圍城時彩與子秉銓禦賊于南門城破秉銓戰死時彩被重創家人徐忠負逃城外不死彩妻周氏銓妻蔣氏俱不受辱合家三十餘口皆被害

丁雲字霞光陳州廩生景瑞次子性剛直有勇力崇禎辛巳五月闖寇方熾雲奉睢陳道命至沈邱探賊隻身入營殺賊數十人並戮其首領賊追至白善集苦戰自辰至夕身受百餘矢罵賊而死睢陳道感其忠烈移尸教場率營伍致祭焉

按舊志疆域城東南載百善集茲曰白善未知孰是

崔泌之字小定本陳州人中鹿邑籍進士知雄縣調清苑多所建暨舊令黃宗昌爲御史劾周延儒延儒屬保定知府撫宗昌罪知府以屬泌之泌之曰殺人媚人可乎知府愧且怒會泌之遷戶部主事知府誣以侵隱錢糧三萬不聽行御史行部至泌之

直前與知府角御史以聞下獄遣戍久之釋還崇禎十五年二月李自成數十萬衆來攻睢陳兵備僉事關永傑知州侯君搢與泌之及舉人王受爵等率士民分堞守賊遣使說降斬其頭懸之城上賊怒攻破之泌之用鐵杖斃賊數人自到死事聞復

原官

史明

邑舉人郝韶景傳其事畧云先生諱泌之字饑仲號小定副貢贈光祿卿應閔子陝西巡撫源之堂弟也幼孤有奇才稍長即能詩古文辭爲諸生時便隱然有澄清四海之志憫時嫉俗激昂慷慨人或笑爲迂濶目爲疎狂而公若弗知也者歸德太守鄭三俊汝甯司理魏應嘉深器重之曰此人學問氣節未可量也由思貢生中天啟辛酉科舉人乙丑進士工部觀政八月授雄縣知縣以治行卓異調清苑縣知縣政績有聲陞戶部主事清苑前令黃宗昌爲御史劾輔臣周延儒當事思有以中之因嫉保定知府史躬盛諷公遮宗昌前任不法狀公毅然曰殺人以媚人吾不爲也躬盛希當事旨故留之不遣必欲假公以陷宗昌相爭於巡按御史前公怒奮拳毆之逮赴西曹鞫獄者令以黃宗昌爲辭將移罪宗昌而薄其罰公堅持不稍苟後移鎮撫司嚴訊拷掠備至公堅持如初繫獄四年以他事羅織謫戍山東在城驛久之釋還居郡城中課子弟輩讀書晏如也崇禎

十五年三月十二日李賊圍陳郡中皇皇公獨率子弟輩二十餘人畫策守禦晝夜不違息忽東南隅火藥局災賊乘之破公猶手持鐵杖拒戰立斃數賊賊眾蟬集至金龍橋遂破賊雅聞公名欲屈公故以甘言誘之公曰聖朝臣子有死耳豈能從爾輩苟活耶賊怒乃縛公子弟輩就公前每殺一人必問公曰降否公罵愈甚賊怒益深遂同遇害公被禍尤慘賊懸尸南門上賊退有崔某者歛之葬於崔老家之原我朝定鼎深念孤忠凡諸死難者皆蒙卹錄康熙戊子准河南學臣湯又曾奏贈中憲大夫光祿寺少卿謚忠烈入忠義祠奉祀其同時遇難者公胞弟鴻臚寺序班涇之堂弟廩生藻之潔之庠生涵之混之涓之浩之傑之監生洵之處士瀆之潔之嗣子庠生果胞姪庠生棠堂姪庠生杞楠柱榜棊楹處士桔檄也婦殉夫死者公夫人隨氏涇之妻趙氏藻之妻張氏棠妻朱氏楠妻李氏柱妻俞氏棊妻于氏節婦殉難者庠生靜之妻張氏庠生瀛之妻丁氏一門節義曠代無兩百餘年來光靈

王受爵舉人李自成攻陳州與崔泌之等分堞固守城破擊殺數

賊大罵不屈死贈宛平知縣明史

劉淳陳州世襲掌印指揮崇禎八年率眾殺賊九年至十三年屢

勦土寇印二毛等搗其巢穴又殺袁時中等賊幾無孑類撫按

嘉其功特加文武旌旄兼管軍民十五年闖賊攻陳戰死

胡守祚其先世祖抱忠洪武時授陳州世襲指揮知勇過人有祖風闖賊攻城守祚守西門賊將執旗馳馬近城守祚射之中臂城陷賊索射已者守祚方巷戰被執賊以好言誘之曰雖射我不汝憾若從我立功願同享富貴守祚罵不絕口乃見殺

傅鴻勳衛指揮同知先世以武功曜始祖必文元末從太祖軍渡

江克采右太平溧水溧陽等處以功充萬戶征太湖陣亡子貴

業大都督府起赴馬鞍山管水軍操練充沅州衛百戶洪武初

以征靖州苗授流官勅命三年進攻湖南等處山寨五年征諸

洞蠻夷累授世襲勅命兩道子英於洪武二十三年欽准襲職

授昭信校尉大衛中衛左所世襲百戶旋以年勞授正千戶歷

陞指揮僉事永樂二年除鐵嶺衛中所正千戶十二年北征陣

亡子傑襲職以疾廢子春替職累著戰功歷陞本衛指揮同知
成化八年病故子霖襲年老子鎧替職正德三年陞都指揮僉
事海州備禦又隨副總兵劉暉征剿山東河南流賊於滕縣沙
溝冠縣等處節次對敵斬獲匪夥陞授驃騎將軍都指揮使司
都指揮使御賜蟒袍以防守蒙古功賞紵絲二表裏銀千兩十
三年病故伯祖瀚替職嘉靖中歷委開原甯遠鐵嶺等處備禦
累有斬獲勅陞守備甯遠等處都指揮僉事又奉勅充遼東游
擊將軍陞署都指揮簽事病故堂伯父胤以嫡長男替職嘉靖
三十八年委管叅將中軍人馬次年遇賊橫頭河被傷回營身
故之嗣鴻勳父嚴係胤親支堂姪仍授世襲指揮同知到任管
事物故勳承襲由遼東鐵嶺衛調陳州指揮同知崇禎八年調
征黃舖賊首郭謙海等殺賊衆十二年流賊寇西華勳領兵

在山子頭杜營殺退蒙督撫題奏旌獎十五年闖寇圍陳勳背城以戰殺賊無算賊衆我寡勢不能敵遂以身殉入忠義祠子相武生

陳尙嗣字秀峯守備弟尙家字柱峯都司丁酉拔貢王謨子甲戌進士光祿少卿樸之孫也以祖功世襲陳州衛指揮千戶兄弟生而竒偉勇畧過人闖賊圍城分守西門賊不敢近火藥局突賊乘煙登城尙家巷戰連刺數十人賊至愈衆勢不支自刎死尙嗣率衆截殺力竭被執賊愛其勇欲降之結曰縱吾至家即降賊縱之歸乃端坐中堂大罵曰我祖父累代忠義爲國世臣恨不能盡滅醜類以報國所以不即死者欲正命以遂志耳此吾死所也罵不絕聲伸頸飲刃而卒尙嗣妻宋氏姪婦魏氏皆同日死

白傳芳字瑩之世襲陳州中所正千戶加千總銜髯長過腹驍勇善戰從左所指揮劉淳殺流賊有功又從後所指揮李元春勦土寇邱二毛鄭和軒等每戰先登破賊巢穴以功歷掌本所印務崇禎十五年三月闖賊圍陳守南門知事不支預以槐花水染身茜草紅手足甲屬弟同芳曰吾食君祿當死王事出戰決無還理當按色檢吾尸城開與子受采肩背相倚殺賊無算賊預伏大炮于思陵塚翌日誘至伏所炮發父子皆被害同芳按色檢得下體受采尸失所在傳芳妻劉氏與婢女春花俱殉節同芳僅以松門葦席合葬兄嫂于三塚淫攜世譜官詔奔于城東北古家橋世居焉同芳子鳴珂由誅州登歲薦傳芳後無聞徐乘銓天啟初襲指揮使屢勦土寇擒獲甚衆崇禎十五年三月闖賊攻陳城破力戰死

楊廷恩世襲百戶慷慨而俠明崇禎中李賊破陳廷恩被執罵曰
吾乃朝廷世爵逆賊焉能辱吾賊及之罵聲不絕賊斷其舌繼
以手畫地至死不屈

丁漢英陳衛中所百戶始祖回佐太祖戰鄱陽有功予世襲漢英
襲職闖寇圍陳守西門東南隅陷漢英步戰被執脅降不屈罵
賊而死妻陳氏殉節別有傳

何落昇崇禎十五年闖賊破城士民逃竄或連之去落昇曰吾豈
苟且貪生者正襟危坐不動賊叱之跪不應復令掘窖糴糧昇
大罵賊怒擊殺之

于鶴齡光祿寺署丞父之大由進士官知府多善政鶴齡事繼母
以孝聞喜賓客重然諾崇禎庚辰歲大荒斗粟千錢餓殍枕籍
鶴齡施豆穀數千石以濟戚族貧者贍之收育道旁遺孤又代

贖負差鬻子女者闖賊圍陳監司牧令率眾堅守鶴齡捐金濟軍能傷一賊者給花幣城陷賊入鶴齡率三子喬春喬芳喬蔭家丁胡強等奮臂大呼巷戰久之力竭並死僅存幼子喬蕙負屍而葬父子主僕忠義凜然不少屈後喬蕙入馱庠

吳二陽字爾庖世居陳州垂髻善屬文性孝友弱冠入庠食餼九科不第由明經授刑臺司訓寇氛日熾上守城二十四策當事嘉納寇至刑果無虞刑民德之薦授山東青城知縣以病歸闖寇薄城州牧造廬請戰守計二陽奮袂率眾捍禦三晝夜矢石交下傷渠魁無算城潰髮指眦裂罵賊死之

季銓武舉陳州衛人性豪俠貌魁偉膂力過人闖寇圍陳率民夫東門禦寇城破賊持及脅降罵賊不屈投壕死越數日賊去其子得屍顏色如生

祁遇字元升廩生素性慷慨見義必爲闖賊之亂分守城隅城陷
巷戰搜及死

齊自濬增生萬厯舉人高密知縣國佐長子也性磊落忠孝自矢
闖寇至自濬登城守禦有策城破被獲賊曰降則生否則死自
濬鬚髮張豎曰天下有降賊齊自濬乎咬指辱罵血流滿頰賊
殺之繼妻牛氏妾張氏姚氏王氏扶自濬母並張氏所生子避
賊賊去尋自濬屍累日始得牛氏率張姚王三妾共矢柏舟奉
姑撫子後人蕃衍一門忠節可風云

謝允隆與弟允茂允美皆邑庠生居常義氣過人流賊攻陳二人
持戈拒賊城破被執不屈與堂弟武庠可觀可望皆遇害

宋澄性字月洲庠生好古力學以綱常名教自任闖賊圍陳勉諸
子以大義城破具衣冠端坐賊不敢犯澄性罵賊就及而死者

述其富悉爲賊焚

徐時卜字康兆弱冠餽于庠慷慨尚義有大節不奪之志闖賊攻陳與姑子崔泌之持矛拒賊城破猶手及數賊被執罵賊不屈賊刺其目罵益甚復斷其舌猶戟罵至死神色不變

徐時麟庠生與弟時豐並矢忠孝賊攻城兄弟持鉞拒賊城破皆被執不屈死之順治十二年四月睢陳兵備李世耀旌其墓曰志士捐軀

胡寧明博通經術砥礪名節爲諸生有聲巽序流賊圍陳倡率堵禦不遺餘力城陷不屈而死

龔作梅有夙慧甫能言父尙德授孝經忠經皆成誦稍長讀書多敏悟自矢忠孝年十七父母俱亡殯於舍賊破陳城火民居作梅跪柩前焚死

吳王敬與弟止敬俱庠生崇禎壬午李賊圍城兄弟天以身殉城
破穿青衫罵賊於東門賊怒甚及王敬醢其口止敬爭之賊又
醢焉併戕其家王敬妻季氏止敬妻郭氏與家人三十餘口皆
遇害二氏別載貞烈

穆進京字畿輔陳州回民清真寺掌教也性耿直忠義闖賊圍城
睢陳兵備率官紳士民登陴固守圍愈急進京聚回民二百餘
號清真營誓曰君父之仇不共戴天能從吾者以死拒各執澁
戰賊一以當百傷賊渠千餘賊勢少減越日兵備僉事言退賊
非清真營不可乃尊京爲老太師作前隊進京率回民與賊拒
二晝夜殺賊衆過半賊大怖欲遁會城東南隅砲藥火賊乘煙
而登官民遭害回民殲焉進京猶罵賊巷戰死

賈希呂庠生陳州衛掌印指揮使庭詔子崇禎壬午流寇陷城希

已慨以身殉全家皆被害幼子克壯年十四被執乘間而遁旋被追兩臂中七矢割其耳輪後伺間脫去遇其僕李友負之逃臨蔡城若徐時魁厚遇之妻以女賊平克壯入庠舉鄉飲介賓張嘉遇字鵬壽考授州判以中原多故捐千金修城崇禎十五年三月李自成圍陳州嘉遇輸子弟兵五十名守西門三日賊破東門屠城嘉遇死之合門六十餘人皆遇害惟幼子爾芳被虜乘間越城而逃張氏尚有後

任漢明屬員生明季李自成寇陳漢明被執賊降之罵賊不屈賊怒斷其首而去後世列膠庠貢成均代不乏人恩貢生林森廩生鳳曉即其裔也

補

按明季闖賊之亂陳州被禍甚烈同時殉難者武職又有孫延祚王丕顯薛善政李毓秀周卜年李恭全彭希賢馬君愛

周爾傑陳報君謝百戶失名王尙起陳善祚李養素紳士又有
黃欽詔趙舒口張瑱鄭廷弼劉相機宋文運于可大彭慰祖
鍾聖真李之麒湯三讓李鐸李鏞何大道孔德蛟王胤魁王
易貞張遐齡何大成張允達胡士弘何懋忠劉附名劉瑞色
張允發張允器張問奇朱希雍于養默謝之田馬鴻樂周卜
世張偉環李大賓等並附載於此

清

丁昌祚字純字孝行特著流寇猖獗祚遇賊與角賊衆至縛祚并
妻朱氏賊怒甚將殺焉祚曰吾夫妻死即死耳不能爲不義屈
何怒爲賊壯之釋去歸里後田地荆棘居民倉惶祚授貫倡耕
鄉人賴焉州牧舉鄉飲介賓年八十八卒

吳邦泰字景陽勇敢仗義明季闖賊破城吳氏多被害邦泰手刀

與戰罵不絕口戰且走至月波寺頭顱中傷躍入水夜出裂屍
衣裏傷處流血遍體至家寂無人提刀出城賊問若係曹營宋
營以爲賊黨也邦泰漫應之曰曹營遂脫難至吳家堂關帝廟
傷重不能行賴僧元明調愈後赴七里河老庄覓其族僅得一
弟安泰甫七歲一子一族孫皆六歲又鄰童胡會圖楊小樓李
明興等皆收養之携避譚家寨賊平訪兄開泰於項城與同歸
合巹晚年閉戶課讀姪庸敬孫苞皆入庠姪孫必恭中康熙己
卯舉人曾孫蒼曉等亦列巹序今吳氏繁衍皆邦泰力胡李二
人既長各令歸宗又爲楊小樓娶妻買順河村地投居焉年八
十四無疾而卒

以上舊志

方萬勇武舉考補把總咸豐二年隨向提督剿髮匪於牛頭洲陣
亡旌卹

嚴學泗行營外委咸豐二年率子汝舟隨軍出師蒲圻同日陣亡
旌卹

王泰來歲貢生劉心平千總銜咸豐六年均率團與皖匪打仗陣
亡旌卹

郝文萱郝永彩閭懷真皆團勇丁多佑善武技均於咸豐七年往
平毫寇陣亡郡守安頤曰捐軀報國人鄉團忠義祠

徐崇文監生匪至馬塘集率團堵禦力戰陣亡死者二十人
劉占元營兵咸豐七年隨營攻新興集教匪陣亡

雷全忠六品軍功咸豐七年出師廣西攻湖北牛頭洲打仗陣亡
張建功把總李平州外委咸豐八年與匪打仗陣亡給卹

陳彥臣監生撫標左營守備大慶父辦練鄉團咸豐九年院匪圍
陳家寨彥臣率勇打仗陣亡寨亦旋破蒙卹

梁良三御前侍衛懷慶府都司咸豐九年在任與匪力戰陣亡

魏學校咸豐九年與皖匪打仗力竭陣亡入忠義祠

季文嘯六品軍功練總王繼先王繼武附生秦廣聰魏天賜羅顯章王盛祥宋允甲均於咸豐間隨太康令祝壇在裴橋麻種等處與匪打仗陣亡

丁朝祥六品軍功咸豐十年與捻匪打仗陣亡旌卹

方會瀛武生成豐十年自備餉募勇二百名隨同副將馬春華在鹿境與匪交仗陣亡

王宗鳳武生任雙堂咸豐十一年在本地方帶團打仗陣亡

李興鈞咸豐間隨營平匪劍陣亡友聞劍死復入圍殺賊數人力盡而死李玉秘朱占鰲均打仗陣亡

丁朝元捐職把總咸豐十一年攻剿苗黨陣亡旌卹

尹念之陳州營把總王玉來曾經制外委均在湖北打仗陣亡給

卹年月
失考

周士鎮東河候補主簿殉難

詳失考

張儒秦李貞介隨郡守會營剿辦安徽阜西廬村教匪打仗陣亡
張峻德咸豐間隨郡守安奎平南爐教匪陣亡入昭忠祠

耿國瑞咸豐間率團齎糧數車在戴集禦匪力戰六日逾年匪陷
周口帶團力拒被執罵不絕口匪殺之

王禮義咸豐間平匪陣亡入義勇祠

陳盡臣增生

任陳灘寨

賊匪破寨盡臣畏辱先縱火焚其家人十三口

乃自殞

趙叢林貢生連天榜庠生連雲驥監生

均任倒栽槐

咸豐間在本地方

率團與匪打仗陣亡

段應林咸豐間以練總率團禦匪於宜路店三戰三捷是夜匪乘機劫營勢不支陣亡

盧兆祥重氣節讀史遇忠孝變不忍釋擒匪之亂傳聚寨長張文仲聘其兄瑞祥入寨泰畫工未竣賊至文仲瑞祥皆遇害兆祥被擒匪令降兆祥曰若盡出寨中人吾自順匪從之人盡出乃曰豈有從賊盧兆祥乎奪匪及殺數十人氣竭被匪斷指終不屈遂遇害

趙廷標六品軍功管帶天津慶凱營攻克江南阜陽邢灣賊寨陣亡

陳學孟劉秉泰庠生劉宏業監生皆知兵辦團練同治二年流擒據孫寨縱橫八十餘里圍攻魯臺集寨學孟等率團千餘人接仗自晨至申殺賊七百餘名賊分出背後團眾潰三人死之寨

遂破遇害者二百七十八人學孟秉泰優卹給予雲騎尉世職
劉廷林千總銜同治五年督團與皖匪打仗力竭陣亡旌卹

王文開膂力過人能挽三百弓家貧充伍同治五年適至柏木岡
值髮匪偏寨數騎挑戰文開奮身與鬪左衝右突賊不敢逼匪
大至不支力戰死

劉耀堂捐職都司前隸曾文襄麾下充勲字楊營哨官調赴湖北
解圍督勦受傷歸養漸痊同治六年七月在城西北觀音堂帶
團打匪奮戰陣亡

劉盤雲候補營千總同治六年在忠心集率團與皖匪打仗陣亡
旌卹

張有洪同治六年在省城南打捻逆回匪陣亡

楊春祥記名提督同治七年西征八年圍攻甯夏府王家疿猶逆

老巢陣亡贈太子少保銜並騎都尉兼一雲騎尉襲次完時給
恩騎尉世職予謚果壯建立專祠

陸文體少有大志投効張軍門營保薦五品軍功光緒三十三年
沛邑會匪作亂張由清江移兵赴勦文體爲前鋒殺匪致果方
擬超擢至十二月十四日與匪接仗陣亡給卹

咸同間與難遇難者

咸豐七年

傅長泰

任大傅莊

擒匪入村與其孫焚罵賊不屈被賊支解

李廣書在黃集率衆敵賊力戰被戕同死者三十三人

姜紹興

任姜樓

皖匪入村罵賊不屈賊焚殺之

段祥

任王集

擒匪肆掠罵賊被害同時死者戴思明葉立言李萬損

徐天位葉恒楚丁老虎陸垂七人

王仲培擒匪入村罵賊觸怒破腹而死

八年

李鴻義

在馬塘集

與賊力戰被戕子雲閣女變姐均遇害

李雲龍龔鳳秦王永吉袁膺魁李忠良楊春和楊德周李漢文尤
景鳳尤勤修王成聚李二龍李三龍宋文光馬金圖擺成林周
雲彩胡全鎖貴趙進才楊振鐸朱貴鄭有名李魁鎖太平鎖懷
德胡有德李相馬樹人郭和興黃玉璽張霖閆學杜二朱珍李
文李長安胡天壽奈公孟喜張印均係回民隨同叅將馬春華
通判王可思在周家口與匪打仗而亡

九年

李玉振

在李庄

率子秉初秉祥在本村與皖匪戰而亡

楊振聲

在陳灘寨

率眾禦賊力戰而歿死者一百五十五人

錢有選在柳林集罵賊被戕同時死者錢時曉郭振明梅上林季

海清陳金章梅兌于文章陳廷聘秦繼善張太等十人

曹明章

在柳林集

率子長輩次好三秘四鷺與賊力戰賊蜂擁至不能

支遂遇害

王得森

在王樓

罵賊被戕同時死者二十一人

孟興禮

在柳林集

院匪肆擾罵賊被戕同時死者貞本盧利害李郎頭

齊鳳鳴張瑞林陳文章齊官梅芥從名陳費武胡體端李座陳

控韓鐸陳海濤尙繼龍秦銓賈魁于華亭等十九人

劉心玉率衆在祁花園與匪接仗戰歿同時死者十六人

趙廷颺庠生

在陳家寨

在本地方禦匪戰歿

十年

鄭學詩從九品銜在西雙嶽地方禦匪戰歿

常目智勇異常率衆在鞍子嶺與匪接仗斬賊數十名賊衆力竭
戰死同死者二十九人

李鳳池率衆在侯家舖禦賊戰死死者三十三人

丁金聲在丁庄率衆禦賊戰死死者五十一人

柴富在柴庄皖匪入村焚掠富出與戰被戕同遇害者十五人

宋大山于根山于廣興邱文魁丁苟于懷志等均在洞汲村隨練總五

品軍功張宗濬在本地方與匪打仗而亡

團勇朱文理夏賀齊口軒周賈木均隨團長在道嶺岡與匪打仗
陣亡

團勇喻廣方喻根喻義喻全德喻祿喻松文喻宗堯劉銀漢劉景
焜喻本成劉景秋劉步洛許繼孟劉景平蕭德俊黨羅康勞趙
元福王萬福王三趙甲趙多魏苦劉啟盤劉廣術劉名傳劉大

漢劉遂臨劉步衡劉天月劉崑謨劉廣金劉廣羣劉步昇劉德
選劉統垂劉廣遠康有美康登魁康宗魁康廣魁康振魁康鰲
魁康武魁康占魁康雲魁康禮魁康清魁康東興康逢魁康魯
魁康克禮夏莊康羣苗得計康永全胥臣康興魁張道康良孝
常玉龍康得金康良材姚景玉康淇泉康海魁周二莫秀章劉
萬坦張峻嶺洪興曹侶許文正許梅徐鎖徐培心趙玉趙常德
趙金聲韓士康教康士魁康布等均任蔡莊集賈桂榮賈順理賈川
李秀儒舉治邦王繼明苗萬發尙三蘇忠方苗豆苗牛尙興詩
尙關尙湖沈明祖季義劉安蘇成劉雪成劉行苗長義劉效成
賈致祥賈禎祥王元賈夢祥劉步東劉方熙劉永桂韓莊韓敬
聖韓斗劉套劉明夏三劉步衡劉方劉剛府韓汝崑劉步升劉
金德劉永清張遂岳禮舒木李桐孫副魁孫殿魁張法魁張臚

智興國李順李士奇張天德張立志張下來張心理張來治張
娃張玉波張大林田郎曹敬祖尙華耀劉永安張來等

均任周
蔡寨

季文俊季長和季碧雲季峯雲季流楊周蕭然蕭立蕭全高廣
澤高元高印張善等

均任左
楊寨

均於咸豐十年三月十九日隨同

練總在項城地方打仗而亡

張文仲字耀光創修傅寨工將竣匪魁夏宏道張樂行等倏至圍
寨數匝被執置不絕口遂遇害

十一年

劉紹曾

任劉
老家

罵賊被戕同時死者常可治劉登吳白張本修黎應

考黎招趙天和鄧萬里等八人

王鶴年率衆在王七店與匪接仗戰歿死者十二人

張好朋

任洞
汲村

在本地方禦匪被戕

同治元年

練勇張萬良張萬祥張萬福張魚旺魏學孝魏朋友魏朋迎魏連
魏合郭天信郭官郭敬郭吉郭道崔本固劉芳徐養王祿林王
銓曹懷甲史水陳琢章均任戴家集在本地方打仗而亡

蕭猪任盧家堡在本地方堵匪戰歿

卽得姜任卽店率子四人長大哇次馬三文體四武興並同村精拳
勇者數十人奮力禦賊殺百餘人賊蜂擁至父子俱被害死者

三十三人

金國興任張普還庄率族敵匪力竭被戕死者十九人

劉錫銘任胡樓率衆戰匪大隊擁至力不能支被戕死者三十二人

張自孝任窪張庄寨流匪攻寨率族死守寨陷受傷殞命同遇害者三

十四人

戚五峯

任賊

賊圍寨率眾固守二十八日賊攻急出與戰不勝寨

陷被戕死者三十人男婦遇害一百二十人

楊永先賊圍龍王廟寨率眾守禦賊以計攻寨陷賊手及之同時

遇害者五十一人

黃玉書流擒圍攻孫寨寨破被戕同遇害者四十五人

李曉嵐

任白

在本村與匪力戰而亡同戰死者十六人

胡三聘與弟三變賊破孫寨負母外逃身被賊圍戰死

馬萬春胡東峯

任晨

在本地方敵賊戰歿

二年

李瑞吉

任李

率眾追賊至集南廣漕被戕死者十五人

陳嘉會監生

任牛

與胞弟嘉忠率眾禦匪殺賊九十餘人力竭被

戕死者三十三人

王保奇任馬寨素剛直爲眾推服擒匪粹至保奇率眾與戰力竭被

賊同時死者六人

吳景德任吳營與匪力戰被賊死者十人

張岩山任戴集丁治文丁三王貴尤倉朱鐵王學貢任大良店均敵匪戰

歿

四年

黎應道任九里溝賊倏入村率眾力禦殺賊十餘名賊眾力竭被賊死

者九人

黃得申等二十八名均與匪戰被賊蒙卹

五年

李文俊二月初五匪至河波村文俊等罵賊被賊死者十六人

以下民國

黎士賢營山縣哨官在任五載土匪斂迹充周鎮保安營哨官元年平匪陣亡

劉占魁以陸軍備補兵隸天津西區蔣警長麾下正月間津埠譚
變警署被圍魁在圍中砲斃數人翼蔣出魁罹於難身卹銀五百元

嚴承樞二年以步兵在光山縣打匪陣亡

張敦良以步兵在光山縣打匪陣亡

馬騰蛟武生充歸德鎮標馬兵兩署周口協捕廳赴考城勦土匪而亡

靳祥雲充本縣警隊四年隨警佐張萬傑勦土匪被戕